

Jon

Od Anĩ Tamo Wõ Yen

¹ Gariya bun Od anĩ ibodon, Od anĩ Negur ado dibodon, Od anĩ Negur.

² Gariya bun ã Negur ado dibodon.

³ Ì bunem ereb ereb ganan inon, Od anĩ sã bun ereb inodin taka to ibodok.

⁴ Mata ã bun ibodon, mata anĩ tamo neid fula fiya.

⁵ Fula fiya anĩ gugum bun lalan ifenek, anĩ ere, gugum ã fula fiya anĩ to kelein.

⁶ Tamo taka Negurem sur fe di, isin, ã yana Jon.

⁷ Ì fula fiya anĩ yaor fe, kurõ fesiyouf nigin isin, are tamo kayau ganan ã bunem momoi douf nigin age fen.

⁸ Ì anĩ fula fiya sã, ã fula fiya anĩ kurõ fesiyouf nigin isin.

⁹ Fula fiya bagai yogon tamo kayau ganan lalan ifenēdif, ã tenebur isin.

¹⁰ Ì teneub bun ibodon, are ã bunem teneub inon, anĩ ere, tamo kayau tenebur ein, ã to kelein.

¹¹ Ì yogon bagai anidi bun isin, anĩ ere, yogon bagai anidi ã to daleyen.

¹² Anĩ ere, idi ã daleyen, ã yana nigin momoi den anidi bun, Negur idi Negur nē gere tar wowã douf nigin igirnēdin.

¹³ Sina tama nē naud bunem to Negur gere tar wowã den, bouwa nē oroya bunem sã, tamo nē

wau irōya buneg sã, anĩ ere, Negur yogo age fe di, wowã den.

¹⁴ Od anĩ tamo wõ ye fen, ada atun ibodon. Ada yogon fula fiya medeĩa tailen, fula fiya medeĩa are Naal Tekelei Yogo Dogol nẽ, ã Tama bun tamal wau ifenẽya ado momoi barikã isin.

¹⁵ Jon ã nigin kurõ falaisi wogõ yen. Ñ ıweig fen, iron, “Ñ enei nigin aya arokenein, ‘Taka ã aya dumeun isif, ã aya wal fiyaya, ere nigin, ã ket ibodon.’ ”

¹⁶ In wau ifenẽya barikã bunem, ada adok el fiya tale fen, anĩ teten el fiya musei talen.

¹⁷ Are Moses bunem lo anĩ talen, anĩ ere, wau ifenẽya ado momoi anĩ, Jesus Kristus bunem isin.

¹⁸ Taka nem Negur to bagai ilen, anĩ ere, Negur Naal Tekelei Yogo Dogol, ã Tama wagen ibod ken, ã nigin yaor fen.

*Jon Naan Igunẽdiya Tamo Ñ Yogo Nigin, Aya Kristus Sã, Yen
(Matyu 3:1-12; Mak 1:1-8; Luk 3:1-18)*

¹⁹ Juda tamo Jerusalem temeleid idim, pris tunĩ, Lewi nẽ ibor geid sur difedi di, Jon ã aim yeya anĩ to difiyẽ di, Jon ã eig ye kurõ fesin.

²⁰ Ñ wa fiya sã, kurõ falaisi, “Aya Kristus sã,” yen.

²¹ Idi ã to difiyen, “Age fiyauaf are, õ ai? Ñ Eliya de?”

Ñ iron, “Aya ã sã.”

Idi diron, “Ñ Profet amã tari mafef anim de?”

Ñ iron, “Sã.”

22 Age ye di, idi diron, “Õ ai bagai? Õ amã urokanamã len, idi amã sur difaman anidi gein ke ma malauf. Õ ogo nigin ere wof?”

23 Jon profet Asaia nẽ od bun solof iron, “Aya anĩ, ait taka gerere tuan iweig irok, ‘Odug nẽ naab madur gouf.’ ”*

24 Farisia tamo tunĩ sur difedin anidim

25 to difiyen, “Õ Kristus sãf, Eliya sãf, Profet anĩ sãf are, ere nigin naan ugunẽdif?”

26 Jon aitedin yale iron, “Aya naan nem naan agunẽdif, anĩ ere, ã atun, taka ã keleĩ sã anĩ ifaref.

27 Ì anĩ aya dumeun dõ fiyaf, aya to biya nigin, in ye su nẽ malũ biru fediya kisi feleya sã.”

28 Enei ganan Betani oun Jordan naan sitakã, Jon naan igunẽdin nẽ an wõ yen.

Jesus, Negur Nẽ Sipsip Naal

29 Naa taka di, Jon, Jesus wagen iyok isi mog, ile fen, iron, “Ulegef, Negur nẽ Sipsip Naal, ì tamo ganan neid mosor yaleledif!

30 Enei nigin au fen, oron, “Taka ì aya dumeun isif, ì aya wal fiyaya, ere nigin, ì ket ibodon.’

31 Aya yug ì keleĩ san, anĩ ere, aya asi, naan nem naan agunẽdif nẽ gariya are, Israel tamo kayau bun ì yaor foug nigin.”

32 Age ye fen, Jon enei kurõ feis iron, “Aya, Awa Ur saa ilun tamal kuburir gen isi, ì bun ibod mog, ailen.

33 Aya ì to kelein, anĩ ere, taka ì, aya naan nem naan agunẽdiyof nigin sur fiyan im irokanan,

* **1:23:** Asaia 40:3

‘Tamo anĩ, Awa Uur isi, ã bun ibod mog, ulouf, im Awa Uur Fateul nem naan igunēdiyof.’

³⁴ Aya ailen nigin kurō afeis, ‘Eĩ Negur Naal, auf.’”

Jesus In Dō Fiya Tar Uyulil Iweignēdin

³⁵ Naa taka di, Jon, in dō fiya tar uru geid, baban an difaren.

³⁶ Ī, Jesus isi ile di, ile fen, ĩ iron, “Ulegef, Negur nē Sipsip Naal!”

³⁷ Sain Jon nē dō fiya tar uru enei karĩ de fen, idi Jesus dō difiyen.

³⁸ Jesus falei yel, idi ĩ dō difiyē mog, ile fen, to fedin, “Ã ere oroyeik?”

Idi diron, “Rabi (anĩ nē gariya, Tise), õ nain ubodōdig?”

³⁹ Ī iron, “Umag fen, ulogouf.”

Age ye di, idi dile, ĩ ibodōdig anĩ dile fen, naa anĩ bun, ĩ geid dibodon. Are aragau fo kilok age fiya.

⁴⁰ Endru, Simon Pita ne tura ĩ, idi uruwom ereb Jon wogō yen anĩ karĩ de fen, Jesus dō difiyen anĩ taka.

⁴¹ Erebu uruwa Endru age fen are, ĩ tura Simon imir ile fen, irokenen, “Amã Mesia (anĩ Kristus) fotou mafen.”

⁴² Age ye fen, Endru, Pita Jesus wagen irou ile di,

Jesus Pita lo fiye ken, iron, “Õ Simon, Jon naal. Õ yanã Sifas douf” (Sifas falei fiyauf are, Pita).

Jesus Filip Nataniel Ado Iweignēdin

⁴³ Naa taka di, Jesus Galili ileyā nigin kisif fen, Jesus Filip fotou fiye ken, irokenen, “Aya dō wiya.”

⁴⁴ Filip ī, Endru Pita ado geid, Betsaida taun temeleid.

⁴⁵ Filip Nataniel fotou fiye ken, ī irokenen, “Amā ī nigin Moses nē Lo bun itoton ado profet idig ditoton, Jesus Nasaret tamal, Josef naal anī, fotou mafen.”

⁴⁶ Nataniel to fen, “Nasaret! Ereb biya taka, anenem wōya nigin kisi feleya de?”

Filip iron, “Usi ule.”

⁴⁷ Sain Jesus Nataniel non iyok isi mog, ile fen, ī nigin iron, “Eī Israel tamo bagai, ī bun erēb idegēya taka sã.”

⁴⁸ Nataniel Jesus to fiyen, “Naig wo fen, ō aya kelei?”

Jesus aiten yale iron, “Aya ō Filip iweignōya sã mog, aa fig farumen ubod mog, ailiyon.”

⁴⁹ Age ye di, Nataniel Jesus irokenen, “Rabi, ō Negur Naal, ō Israel neid King.”

⁵⁰ Jesus iron, “Aya ō aa fig farumen ailiyon aul nigin, ō momoi wof. Ō anī wal fiya erēb erēb odug ulouf.”

⁵¹ Ī tobol fe iron, “Aya ã momoi bagai aro-keneik, ã, saa bobog kã fele di, Negur nē engel Tamo Naal bun diselef disif dife mog, ulougouf.”

2

Jesus Irō Di, Naan Wain Falei Felen

¹ Naa uru bure fele di, naa towo bun, tamo kayau ado bagu fiya, Galili distrik oun Kana fonō wō yen. Jesus sinag an ibodon.

² Jesus in dō fiya tar geid idig, tamo kayau ado bagu fiya bun diweignēdin.

³ Sain wain sa kele di, sinam Jesus irokenen, “Idi wain taka sã.”

⁴ Jesus iron, “Kayau, ò ere nigin aya kababal wiyaf? Neu sain fau isiya sã.”

⁵ Jesus sina, kabī tamo irokenēdin, “Ereb ĩ irokeneĩf anĩ dōg, ago gouf.”

⁶ Nodin meein gulub sigis naan ifotūya nē difaren, are Juda neid tobonuneid bun imeid kulo fiya nigin, idi teke tekelei 100 lita age fiya naan iroudig.

⁷ Jesus kabī tamo irokenēdin, “Gulub bun naan utinēdig.” Age ye di, idi ditineĩd eweid gere fesedin.

⁸ Age difele di, Jesus idi irokenēdin, “Gama tunĩ lolob ge fen, sifa marau uroule kenēg.”

Age ye di, idi age difen.

⁹ Sifa marau naan wain falei fen anĩ yō ilen. ĩ wain anĩ nainenem be isin anĩ to kelein, anĩ ere, kabī tamo naan lolob difen idi kelein. Agef fen, sifa marau ĩ, kayau marau yerin iweignē, ile di,

¹⁰ irokenen, “Ganan idi wain biya anĩ ket dirousi di, tamo disif idi anĩ fatuk dō mog, to biya gen anĩ dum dirousidig, anĩ ere, ò biya bagai urou ubodom anĩ, gama bagai urousif.”

¹¹ Jesus memelik gariya inon are enei bun, oun Galili distrik Kana fonō. Anĩ bun, ĩ yogon fula fiya medeĩya yaor fe di, yogon dō fiya tar dogo neid momoiya ĩ bun dinon.

Jesus Tempel Waĩ Fen

(Matyu 21:12, 13; Mak 11:15-17; Luk 19:45, 46)

12 Enei bure fele di, Jesus ĩ, sina, tura tar ado, yogon dō diya tar geid, Kapenaum disilen. An naa musei to dibodon.

13 Juda neid Pasa naa sain melsã mog, Jesus Jerusalem iselen.

14 Tempel modoũ bun, tamo, bulmakau, sipsip ado, kuburir na sur difeid fen, tunĩg tebol bun dibod ken, moni solo de mog, iledin.

15 Anĩ ile fen, ĩ malũ nem wip inon, agef fen, tempel modoũ bun tamal, sipsip ado bulmakau ganan irudi di, serẽ dilelen, ĩ moni solo fiya tamo neid koin moni daũf firagagaũ fe fen, ĩ dogo neid tebol yale, falei feledin.

16 Idi kuburir na sur difen anĩ irokenẽdin, “Eneidi ein waleledig, neu Dei nẽ fõ anĩ maket modoũ to unog!”

17 Dum in dō fiya tar, eig ye itotoya anĩ nigin wedereid fokõ yen, “Ogon fõ nigin wau itenẽya anim nameun isainaf.”*

18 Age ye di, Juda tamo Jesus dirokenen, “Ere memelik anĩ ufelnamã di, enei ganan agof anĩ nigin õ igirĩya ado mauf?”

19 Jesus idi irokenẽdin, “Tempel enei narĩ weleg len, naa towo bun baban alesauf.”

20 Juda tamo diron, “Tempel enei dinon are, foti-sigis yar yalen, anĩ õ naa towo bun walesauf de?”

21 Anĩ ere, tempel ĩ wogõ yen are, yogo bouwa nigin.

22 ĩ laa bunem kel fã yen anĩ bure fele di, in dō fiya tar, ĩ iron anĩ, wedereid fokõ yen. Anĩ bunem,

* 2:17: Sam 69:9

idi Negur nē Itotoya ado Jesus wogō yen anī nigin momoi den.

²³ Gama ī Jerusalem oun sain Pasa Sifa bun ibod ken, tamo kayau musei memelik inodin anī dilen, anī bun ī yana nigin momoi den.

²⁴ Anī ere, Jesus ī yogo bagai, idi nigin to momoi yen, ere nigin, ī tamo ganān nigin keleī.

²⁵ Jesus ī, tamo takam taka nigin ī irokenēya anī kisi feleya san, ere nigin, ereb tamo name bun ibodok, ī yogo keleī.

3

Jesus Nikodemus Ifelnen

¹ Farisia tamo taka, yana Nikodemus ibodon, ī Juda uyu irouya neid kaunsel taka.

² Ī bō Jesus wagen isi fen, iron, “Rabi, amā keleī, ō tise Negur bunem usin. Ere nigin, taka nem Negur ī ado to ibodōf are, memelik ō unodif anī inodiya kisi feleya sā.”

³ Jesus aiten yale iron, “Aya ō momoi bagai arokonok, taka nem Negur nē tano to ilouf, ī baban mata gō fiyēf dogol.”

⁴ Nikodemus Jesus to fiyen, “Tamo ī biyan anī, sina naig fe baban gō fouf? Momoi bagai, ī sina namen baban ile di, gō fiyēya kisi feleya sā!”

⁵ Jesus solof iron, “Aya ō momoi bagai arokonok, taka ī, naan ado Awa Uurem mata to wō youf are, ī Negur nē tano bun ileyā kisi feleya sā.

⁶ Bouwam gō fef are, bouwa nē, anī ere, Awa Uurem gō fef are, uur nē.

7 Õ neu od eig au wogõ auf bun, kisi to gurũ wouf, ‘Ã de baban mata wõ gouf.’

8 Yau in oroya bun isi iledig. Õ ait dogol karĩ wodig, anĩ ere, õ nainenem isif be, nain be ilef, to keleĩ youf. Ganan idi Awa Uurem gogũ fedif are, age fiya bagai.”

9 Nikodemus Jesus to fiyen, “Are naig fe, agef wõ youf?”

10 Jesus iron, “Õ Israel neid tise, anĩ ere, õ enei to keleik de?

11 Aya õ momoi bagai arokonok, ereb amã keleĩ anĩ wogõ mauf, age ma fen, ereb amã mailen anĩ kurõ mafesif, anĩ ere, tamo kayau ã fau amã nemã od to walegef.

12 Aya ã ereb tenebur tamal nẽ anĩ wogõ ayeik, anĩ ere, ã to momoi gef, saa ilun tamal nẽ anĩ wogõ ayeĩfeg, naig ge momoi gouf?

13 Aibem taka saa ilun to iselen, Tamo Naal saa ilunem isin yogo dogol.

14 Moses gerere tuan gogour yalesen, age fiya bagai, Tamo Naaleg age de dalesnẽf.

15 Are ganan idi ã nigin momoi def, mata faimud ibodkeleya adouf nigin.

16 “Negur, tamo kayau teneub enei bun ganan nigin fatuk wau laa fen nigin, yogon Naal tekelei bagai anĩ ifenẽdin, are taka ã, ã nigin momoi youf are, to fõ yalauf, mata faimud ibodkeleya adouf nigin age fen.

17 Negur ã, yogon Naal teneub enei bun, tamo kayau es fediya nigin to sur fen, ã bunem tamo kayau teneub enei bun, kel gei fouf nigin sur fen.

18 Taka, ï nigin momoi yef are, to es fiyek, anï ere, taka, ï nigin momoiya sã are, ï mogo es fiya bun ifaref, ere nigin, ï Negur Naal tekelei bagai yana nigin to momoi yen.

19 Foi fiya eig fiya, fula fiya teneub enei bun mogo isin, anï ere, tamo idi dogo neid tobonuneid sane nigin, fula fiya ditor ken, gugum nigin waud laa fen.

20 Tamo idi sane age difef are, lalan to orodidig, ere nigin, dogo neid tobonuneid sane anï yaoreya kumï de fen, lalan namen to disiyouf.

21 Anï ere, aib taka ï momoi bun age fef, lalan namen isidig, age fe di, ereb ï age fen are, Negur bunem age fen anï, yaor dilouf.”

Jon Naan Igunēdiya Tamo, Jesus Nigin Kurō Fesin

22 Anï bure fele di, Jesus in dō fiya tar geid, Judia teneub bun dilen, an ï idi geid sain naal dibod ken, naan igunēdin.

23 Joneg Ainon Salim non naan igunēdin, ere nigin, an naan musei bagai, anï nigin, tamo kayau naan igunēdiyof nigin toku disidig.

24 (Are Jon fau kalabus bun to dinenē mog.)

25 Jon nē dō fiya tar tunï, Juda tamo taka geid, dogo neid tobonuneid dō de fen, imeid kulo difedig anï nigin luwa diroun.

26 Idi Jon wagen disi dirokenen, “Rabi, tamo õ uruwom Jordan naan sitakã ufareg fen, ï nigin kurō weis uron, ï naan igunēdif, age fe di, ganan ï bun dilef.”

27 Jon solof iron, “Tamo ï, ereb saa ilun tamal ifenek anï dogol yalouf.

²⁸ Æ aug aya oron anī sã kurõ walaisi gef, ‘Aya Kristus sã, anī ere, aya ï ket sur fiyan.’

²⁹ Mois kayau are, mois tamo nē. Mois nē mou ï, bagu fiya bun ifar fen, karī fiyek, ï mois tamo nē ait anī karī ye fen, kulīya odug ado. Kulīya are neu, anī gama kisi felef.

³⁰ Æ yana odug ise le di, aya yanau tenebur isilauf.

³¹ “Taka ï ilunem isif, ï ganan wal fiya, taka ï tenebur tamal are, tenebur nē, anī nigin, tenebur nē anī wogõ yedig. Taka ï saa ilunem isif, ï ganan wal fiya.

³² Ereb ï ilen ado karī yen anī, kurõ falaisif, anī ere, yogon od taka nem to yalef.

³³ Taka ï yogon od yalen anim, Negur ï momoi bagai ye fen, anī megeir ifenen.

³⁴ Taka ï Negurem sur fiyen are, ï Negur nē od wogõ yef, ere nigin, Negur ï Awa Uur idikeleya sã ifenek.

³⁵ Tama ï Naal nigin wau laaf fen, er eb er eb ganan ï ima bun inon.

³⁶ Aib ï Naal nigin momoi yef are, mata gai ibodkeleya ado, taka ï Naal nigin itorok are, ï mata to ilouf, Negur nē didi ï bun ibodok.”

4

Jesus Samaria Kayau Ado Wogõ Den

¹ Jesus Jon wal fiye ken, in dõ fiya tar musei geif naan igunēdif ya anī, Farisia tamo karī den.

² Anī ere, momoi bagai Jesusem naan igunēdiya sã, are in dõ fiya tar anidim.

³ Sain Odug enei kelei ken, ï Judia distrik itor ken, baban Galili kel ilen.

⁴ Gama ï Samaria atu ilauf.

⁵ Anï nigin, ï Sikar taun oun Samaria, Jakop, ne naal Josef teneub kulu ifenen non, iyok isin.

⁶ An Jakop nẽ naan ifotokon tutuwõ ibodon, Jesus naab meluk iyok isi, tuwa yu kele di, naan ifotokon tutuwõ sirin ibodon. Are mogo gaa atun age fiya.

⁷ Agef mog, Samaria kayau taka naan ifotũya nigin isi di, Jesus kayau irokenen, “Aya naan tau wana di, ãf.”

⁸ (In dõ fiya tar, taun saaf na yaleya nigin dilelen.)

⁹ Samaria kayau Jesus irokenen, “Õ Juda tamo di, aya Samaria kayau. Naig fe di, ayam õ naan afon, wãf nigin to wiyaf?” (Juda tamo kayau idi, Samaria tamo kayau geid to uyu katõ difedig.)

¹⁰ Jesus kayau irokenen, “Õ safina ege luwa Negur ifonok ado, aibem naan nigin to yok anï keleim are, õ ï to wiyẽ di, mata ifenẽya nẽ naan anï ifonom.”

¹¹ Kayau iron, “Odug, õ ifotũya nẽ safina sã, naan ï ilon bagai. Õ mata ifenẽya nẽ naan are nain walouf?”

¹² Tamamã Jakop naan ifotok kanama ken, ï yogog gere tar ado gaareg anï bun don, õ ï wal fiya de?”

¹³ Jesus kayau aiten yale iron, “Ganan naan enei doko, idi baban naan ail fediyouf.

¹⁴ Anï ere, taka ï aya naan anï afenẽ di, yoko, ï baban to bagai naan ail fouf. Naan aya ï afenek,

warur naan ã namen faimud ulo ulõ yef yenẽ di, anim mata gai ibodkalauf.”

¹⁵ Kayau Jesus irokenen, “Odug, naan enei wanauf, ago di, aya baban naan ail to fiya fen, naan enei bun ifotũya nigin toku ein to kelauf.”

¹⁶ Ñ kayau irokenen, “Ule, ogon tamo uroken ken, kel usig.”

¹⁷ Kayau iron, “Aya tamo sã.”

Jesus kayau irokenen, “Õ tamo sã wof are, õ tutuk urok.

¹⁸ Ere nigin, õ mogo tamo faif adon, tamo gama õ ado are, ogon aiwã sã. Õ ogo urom, are momoi bagai.”

¹⁹ Kayau iron, “Odug, aya õ ailiyok, õ profet taka.

²⁰ Amã tamamã tar, arei enei bun Negur yana dalesedig, anñ ere, Juda ã urõgedig, Negur yana yalesey a modoũ are oun Jerusalem dogol.”

²¹ Jesus kayau irokenen, “Kayau, aya momoi wiya, sain fau isi di, baban arei enei bun ado, Jerusalemeg an, Dei yana to walesagauf.

²² Samaria ã, er eb ã keleĩ sã anñ yana walesegedig, amã er eb amã keleĩ anñ yana malesedig, ere nigin, tamo kayau kel yaleya nẽ are, Juda ibor bun tamal.

²³ Sain isiyouf are, gama mogo yeir isil, Negur momoi bagai yana dalesedig are, uur ado momoi bunem Dei yana dalesauf, ere nigin, idi age fediya anñ Dei ã imirnẽdif.

²⁴ Negur ã uur, anñ nigin, ã yana dalesedig idi, uur ado momoi bunem, yana dalesauf.”

25 Kayau iron, “Aya keleĩ, Mesia (Kristus dedig) fau isif. Ì isiyof sain bun, ereb ereb ganan faded famãf.”

26 Age ye di, Jesus kayau irokenen, “Aya inim yeir od ayok.”

Jesus Nē Dō Fiya Tar Keku De Disi, Jesus Geiden

27 Agef mog bagai, in dō fiya tar keku de disì, Jesus kayau anĩ ado od de mog, dileid fen, terē den. Anĩ ere, taka nem to, to fiyen, “Õ ere oroyok?” be “Õ ere nigin ì ado od gef?”

28 Kayau, ne naan gulub itor yen, taun kel ile, tamo kayau irokenēdin,

29 “Umag, tamo taka, aya ereb ereb ganan age afef asin irokanal anĩ uleg. Ì anĩ Kristus be.”

30 Idi taun ditor disì, Jesus garan dilen.

31 Age de mog, in dō fiya tar Jesus total bagai dirokenen, “Rabi, ereb taka wō.”

32 Anĩ ere, ì idi irokenēdin, “Aya saaf ã keleĩ sã anĩ ãf nigin ado.”

33 Age ye di, in dō fiya tar abob dirokenen, “Taka nem mogo saaf ırousi ifenem de?”

34 Jesus iron, “Neu saaf are, aya sur fiyan in oroya dō afe fen, in kabĩ bure afalauf anĩ.

35 ã eig ge to urōgedig de, ‘Ogō fo bure fele di, kusu fiya sain wō youf’? Aya ã arokeneik, meleĩ fara weleg fen, kabĩ onoudi ulogouf! Idi mogo kusu fiya nē mayo bure felen.

36 Kusu fiya tamo ì gama mala solo yalef, ì gama mata faimud ibodkeleya nē biya kusus fef, anĩ bun, itenēya tamo ado kusu fiya tamo waud al fof.

³⁷ Anĩ nigin, od enei momoi bagai, ‘Tamo takam itenēdig, tamo takam kusu fedig.’

³⁸ Aya, ā kabī to walegen nē an, kusu fiya nigin sur ayein. Tunim kabī total dalen, anĩ ā idi neid maab mala anĩ kusu gen.”

Samaria Tamo Kayau Musei Momoi Den

³⁹ Samaria tamo kayau, taun anĩ bun temeleid musei, ĩ nigin momoi den, ere nigin, kayau anĩ eig ye kurō fesin, “Ī ereb ereb ganan age afef asin anĩ irokanal.”

⁴⁰ Anĩ nigin, Samaria tamo kayau ĩ gein disi, ĩ idi geid dibodōf nigin total bagai dirokenē di, ĩ naa uru, idi geid dibodon.

⁴¹ In od bunem, musei fau fau momoi den.

⁴² Idi kayau anĩ dirokenen, “Amā ogon od bun dogol to momoi mauf, ere nigin, amā mug karī mau fen, amā keleī, tamo enei momoi bagai teneub ganan enei nē Isennēya.”

Jesus, King Nē Kabī Mudur Naal El Fiyen

⁴³ Naa uru bure fele di, Jesus Galili ilen.

⁴⁴ Jesus ĩ yogo iron, ‘Profet taka, yogon fō gariyan, ĩ yana sã.’

⁴⁵ Sain ĩ Galili wō yen, Galili tamo kayau ĩ daleyen. Idi Jerusalem Pasa Sifa bun, ĩ ereb ereb age fen ganan dilen, ere nigin, idig an weim difaren.

⁴⁶ Ī baban Galili distrik oun Kana fonō ki fen, kulu an ĩ naan wain falei felen. Sain anĩ bun, king nē kabī mudur taka nē naal Kapenaum taun an dagi yenen.

⁴⁷ Tamo enei, Jesus Judia distrik tamal Galili isin anĩ karĩ ye fen, ĩ Jesus gein ile, ne naal laa melsã yenen anĩ, isi el fiyēf nigin igonen.

⁴⁸ Jesus ĩ irokenen, “Å memelik uris ado anĩ to ulogouf are, ã to bagai momoi gouf.”

⁴⁹ King nē kabĩ mudur iron, “Odug, neu kesu fau laa fiya sã mog, õ usiyouf.”

⁵⁰ Jesus ĩ irokenen, “Õ wadã ule. Õ naal fau mata ibodõf.”

Tamo anĩ, Jesus nē od momoi ye fen, ilen.

⁵¹ ĩ fau naab iyok ile mog, yogon ferfer ĩ fotou difiye ken, yogon kesu mata ibodok anĩ wogõ difiyen.

⁵² Age de di, ĩ gaa mala ganĩ bun, ne naal dagi karikan anĩ to fiyēdin. Idi ĩ dirokenen, “Bouwa uruwa, nor wan kilok aragau folõ fiye kelen.”

⁵³ Age de di, tama ĩ kelein, sain anĩ bun bagai, Jesus irokenen, “Õ naal fau mata ibodõf.” Anĩ nigin, ĩ yogo, ne fõ tura tar ganan geid, momoi den.

⁵⁴ Jesus Judia distrik bun tamalem Galili isi fen, memelik inon, are eneim anĩ uru.

5

Jesus Dagi Tamo Betesta Naan Kolili Fiyen El Fiyen

¹ Dum, Jesus Juda neid sifa bun Jerusalem iselen.

² Jerusalem an Sipsip Bobog non, naan kolili fiya taka Hibru od nem Betesta dedig ibodok, naan kolili fiya anĩ sirin meein torem fõ faif dinodin dibodok.

³ An dagi tamo kayau musei denenãdig, meleid ifofakeleya, yeid kirorõya, bouweid ilolaisidin.*

⁵ Difaren nē an, tamo taka dagi ado ibodok ile, teti-eit yar yalen.

⁶ Sain Jesus ã an yen mog, ile fen, ã sain meluk dagi ado an yenen anĩ kelei ken, ã to fiyen, “Õ biya leya oroyok de?”

⁷ Dagi tamo iron, “Odug, sain naan moyõ fe di, taka nem isenna di, naanũ isileya to ibodok. Aya asilauf au mog, taka ketem uyu wal fiya fen, isiledig.”

⁸ Age ye di, Jesus ã irokenen, “Fã wo! Ogon gogoũ wenẽdig anĩ wale fen, uyok ule.”

⁹ Age ye di, tamo kaisã bagai dagi sa kele di, ã yogon gogoũ yale fen, iyok ilen.

Anĩ wõ yen naa are, Sabat naa.

¹⁰ Anĩ nigin, Juda tamo idi, tamo dagi sa kelen anĩ dirokenen, “Naa eĩ Sabat naa.† Õ ogon gogoũ irouya nigin lo katũ yef.”

¹¹ Anĩ ere, ã aitedin yale iron, “Tamo ã el fiyal anim, ‘Ogon gogoũ wenẽdig anĩ wale fen, uyok ule,’ fiyal.”

¹² Anĩ nigin, idi ã to difiyen, “Tamo enei nanim, ‘Ogon gogoũ wale fen, uyok ule,’ yom?”

¹³ Tamo el fiyen, ã aib ya anĩ nene yelen, ere nigin, Jesus ã an guru difen anĩ namen iwaikelen.

* **5:3:** Itotoya tunĩ eig de ditoton: *ilolaisidin*. *Idi naan moyõ fof nigin tari difedig.* ⁴ *Sain taka taka Odug nē engel taka isi, naan moyõ fedig. Taka ã moyõ mugu mugu ile fen, ã ket naanũ isilef, ã ereb dagi ado are el feledig.* † **5:10:** Sabat naa anĩ, Juda neid uub nē naa.

¹⁴ Dum Jesus tamo anĩ tempel bun fotou fiye ken, irokenen, “Ulef, õ baban biya lel. Baban mosor to uno, are ereb sane bagai uruwa nẽ wal fiya anĩ, õ bun to wõ youf nigin.”

¹⁵ Tamo are ile, Juda tamo irokenẽdin, ‘Aya el fiyal tamo are Jesus,’ yen.

Negur Naal Bunem Mata Ibodõya

¹⁶ Jesus Sabat naa bun enei age fedig nigin, Juda tamo idi ã morõ difenen.

¹⁷ Jesus idi irokenẽdin, “Neu Dei ã faimud kabĩ yalef isi, gama naa enei buneg kabĩ yalef, anĩ nigin, ayag kabĩ alef.”

¹⁸ Jesus age yen nigin, Juda tamo idi ã dukesiyouf nigin kabĩ total dalen, Sabat naa nẽ lo wal fiya bun nigin dogol sã, ã Negur nigineg neu Dei ye fen, aya Negur ado tekelei yen nigin.

¹⁹ Anĩ nigin, Jesus od enei idi irokenẽdin, “Aya ã momoi bagai arokeneik, Naal ã yogon oroyam ereb taka to age foug, ã Tama age fef anĩ dogol ile fen, ãg age fedig, ere nigin, ereb Tama age fef are Naaleg age foug.

²⁰ Tama ã Naal nigin wau laaf fen, ã ereb ereb age fedig anĩ ganan ifelnek. ã ereb ereb enei wal fiya Naal ifelnẽf, anĩ bun ã terẽ goug.

²¹ Tama ã laa turĩ feid fen, mata ifenẽdidig, age fiya bagai, Naal ãg aib ã orof anĩ mata ifenẽdidig.

²² Tama ã aib taka to es fiyẽf, anĩ ere, ã es fiya kabĩ ganan Naal bun inon,

²³ are tamo kayau ganan idi Temeid yana dalesedig gen, Naal nigineg yana dalesauf nigin ã age fen. Taka ã Naal yana to yalesef, ã Tamam Naal sur fiyen anĩ yana to yalesef.

24 “Aya ã momoi bagai arokeneik, taka ï neu od karĩ ye fen, aya sur fiyan ï nigin momoi yef, ï mata faimud ibodkeleya ado fen, es fiya bun to ilauf. ï laa bun tamal ibal fen, mata bun ilen.

25 Aya ã momoi bagai arokeneik, sain fau isif, are mogo yeir isil, laa tamo Negur Naal nẽ ait karĩ douf, idi karĩ def anidi mata dibodõf.

26 Tama ï yogo bun mata ado, age fiya bagai, ï mata de anĩ Naaleg adouf nigin ifenen.

27 Agef fen, Tama ï Naal es fediyouf nigin megeir ifenen, ere nigin, ï Tamo Naal.

28 “Eig fiya bun to terẽ gouf, sain fau isif, ganan nedi matmat bun dibodok idi, yogon ait karĩ de fen,

29 ulolõ desiyouf, idi biya age difen anidi mata dibodõf nigin fafã douf, idi sane age difen anidi es fedì di, hel bun dilauf nigin fafã douf.

30 Aya neu oroyam, ereb taka to naig be afouf. Aya karĩ auf kilei bagai, aya es afef, neu es fiya are madur bagai, ere nigin, aya yug nigin au fen, to age afedig, anĩ ere, aya sur fiyan ï wau al fouf nigin au fen, age afedig.

Jesus Yogo Nigin Kurõ Fesin

31 “Aya yug nigin aya mugu wogõ auf are, neu wogõya are, momoi be sã be anĩ yaor sã.

32 Taka ï aya nigin kurõ fesidig, agef fen, aya keleĩ, ï aya nigin kurõ fesif are momoi.

33 “Ã Jon garan tamo tunĩ sur wedige di, ï aya nigin momoi od anĩ kurõ falaisi irokenedin.

34 Aya tamom aya nigin kurõ fesif anĩ to aroudig, anĩ ere, aya ã isenneĩf au fen, od anĩ wogõ aun.

35 Jon ï lam futur fen, lalan ifenen, age fe di, ã sain tobega bagai waleg fen, in lalan nigin wauĩ al fen.

36 “Neu kurõ fesiya anĩ Jon nẽ wal fiya, ere nigin, kabĩ aya bure afalauf nigin Dei ifanan alef anim, Dei ï aya sur fiyan anĩ kurõ fesif.

37 Dei ï sur fiyan ï yogo, aya nigin kurõ fesin. Æ ï ait to karĩ gen, nog to ulegen,

38 in odeg ã bun to ibodok, ere nigin, ã sur fiyen anĩ ï nigin to momoi gedig.

39 Æ Negur nẽ Itotoya keleĩ youf nigin kabĩ total walegedig, ere nigin, ã kisi gef, anĩ bunem amã mata faimud ibodkeleya malef ge fen, ago gedig. Negur nẽ Itotoya enei, aya nigin kurõ fesif.

40 Anĩ ere, ã mata yaleya nigin, aya wageun isiya utorõgedig.

41 “Aya tamom yanau dalesauf nigin to orok,

42 anĩ ere, aya ã nigin keleĩ. Aya keleĩ, ã wauĩ bun Negur nigin wauĩ laa fiya to ibodok.

43 Aya neu Dei yana bunem asin, anĩ ã aya to waleyagen, anĩ ere, aibem taka yogo yana bunem isif are, ã walogouf.

44 Æ abob yana yalesey aya anĩ oroyei ken, yana yalesey Negur Tekelei bunem isif anĩ to total unog walogouf are, ã naig ge momoi gouf?

45 “Anĩ ere, ã ayam Dei mala bun ãgenei sane anĩ kurõ afesiyouf ge fen to kisig. Ægenei sane kurõ fesiya are Moses, ï bun ãgenei wauĩ iseya unogedig anĩ.

46 Æ Moses nigin momoi gem are, aya nigineg momoi gem, ere nigin, im aya nigin itoton.

⁴⁷ Anĩ ere, ereb ã itoton anĩ to momoi gef nigin, naig ge fen, aya wogõ auf enei nigineg momoi gouf?”

6

Jesus Faif Tausen Tamo Saaf Ifenēdin (*Matyu 14:13-21; Mak 6:30-44; Luk 9:10-17*)

¹ Enei dumen, Jesus Galili Maaĩ ub sitakã ibal ilen (Galili Maaĩ anĩ, yana taka Taiberias Maaĩ).

² Age fe di, tamo kayau musei ã dõ difiyen, ere nigin, ã dagi tamo kayau bun memelik ino di, meledim dilen.

³ Agef fen, Jesus arein isel, yogon dõ fiya tar geid dibodon.

⁴ Juda neid sifa inoya Pasa naa melsã mog.

⁵ Sain Jesus mala irakel, tamo kayau musei ã garan disi mog, ileid fen, ã Filip irokenen, “Ada tamo kayau eneidi dãf nigin, bret nain na talouf?”

⁶ ã Filip kisi fiye ken, enei to fen, ere nigin, Jesus ã ereb age fouf nigin are ã keleĩ.

⁷ Filip Jesus aiten yalen, “Ogõ eit nẽ mala anim, idi mugu mugu nigin bret na talouf are, tunĩ to dõ dilouf.”

⁸ In dõ fiya tamo taka Endru, Simon Pita nẽ tura anĩ Jesus irokenen,

⁹ “Kesu taka yeir baali bret faif gau uru ado, anim musei ganan enei tau kisi falauf?”

¹⁰ Jesus iron, “Tamo kayau urokenēdig len, dibod.” Modoũ anĩ bun fisir musei ado, an tamo dibodadan faif tausen age fiya.

¹¹ Gama Jesus bret anī geif, Negur de fiye ken, idi dibodadan neid oroya kilei, anī gadō fedin. Ī gau buneg de age fen.

¹² Idi ganan dō kisi fele di, Jesus in dō fiya tar irokenēdin, “Tunī ditoraram anī kurug. To sekil fiyauf.”

¹³ Anī nigin, baali bret faif anī idi dokon, masak tunī ifaredin anī kuru dife di, karam tuwelf isokosedin.

¹⁴ Tamo kayau memelik inon anī dile fen, idi diron, “Mmoi bagai, enei are Profet teneub enei bun isiyouf ya anī.”

¹⁵ Idi disi, Jesus king ibodōf nigin nugo difiyēf ya anī, ĩ kelei ken, baban mugu arein kel iselen.

Jesus Naan Teteatu Iyon

(Matyu 14:22-33; Mak 6:45-52)

¹⁶ Gugumek isi di, yogon dō fiya tar daliyoun disilen.

¹⁷ An idi waag taka bun sosō de daliyou dibal fen, Kapenaum luwe dile mog, mogo gugumen, anī Jesus fau idi garan to isin.

¹⁸ Yau total isi di, maaī moloun wī yen.

¹⁹ Idi waag sur de dira ken, ful de dile, faif kilomita be, sigis kilomita age fiya mog, Jesus naan tetenem waag garan iyok isi mog, dile fen, kumī tererē den.

²⁰ Anī ere, ĩ idi irokenēdin, “Are ayam, to kumī wog.”

²¹ Age ye di, ĩ waag bun dalesnēf nigin waud yenen, kaisā bagai, idi dilauf nē waud iron ub anī bun, waag goro fen.

22 Naa taka di, tamo kayau daliyou ub sitakã difaren idi kelein, waag tekelei dogol an ibodon, anĩ Jesus in dō fiya tar geid to sō den, idi dogo dogol dilen.

23 Waag tunĩ Taiberias temeleid, Odug, bret Negur de fiye ken, tamo kayau ifeneĩd don modoũ anĩ non, goro difen.

24 Tamo kayau, Jesus in dō fiya tar geid an to dibodon anĩ kelei ken, idi waag sosō de fen, Jesus dimirnēf nigin Kapenaum dilen.

Jesus Mata Nē Bret

25 Sain tamo kayau idi, daliyou sitakã Jesus fotou dife fen, idi ĩ to difiyen, “Rabi, ere sain õ ein usin?”

26 Jesus aitedin yalen, “Aya ã momoi bagai arokeneik, ã aya umirnagef, ã memelik ulegen nigin sã, anĩ ere, ã bret ifoutneĩ di, wōg eweĩ gere fen nigin.

27 Saaf sane ledig anĩ nigin to kabĩ waleg, anĩ ere, saaf to sane le fen, mata faimud ibodkeleya bun ibodōdig anĩ nigin kabĩ waleg, are Tamo Naalem ifeneĩf. ĩ dogol Tama Negurem igerne ken, yoya nē megeir ganan ifenen.”

28 Age ye di, idi ĩ to difiyen, “Amã Negur nē kabĩ malouf nigin, naig bagai mafouf?”

29 Jesus solof iron, “Negur nē kabĩ are yeir, Negurem sur fiyen ĩ nigin momoi gouf.”

30 Anĩ nigin, idi ĩ to difiyen, “Ere memelik bun uris wanamã di, mail fen, õ momoi mayōf? Ere anĩ õ unouf?”

31 Amã nemã tubumã tar gerere tuan mana don, Negur nẽ Itotoya bun eig ye yenek kilei, “Í idi saa ilun tamal bret dãf nigin ifenẽdin.”* ”

32 Jesus idi irokenẽdin, “Aya ã momoi bagai aro-keneik, Moses im bret saa ilun tamal to ifenein, anĩ ere, neu Dei ĩ yogo bret kaũ bagai saa ilun tamal ifeneik.

33 Ere nigin, Negur nẽ bret saa ilun tamal isi fen, teneub enei mata ifenek.”

34 Idi diron, “Odug, gama ilauf enei bun bret anĩ wanamã.”

35 Jesus idi irokenẽdin, “Aya anĩ mata nẽ bret. Taka ĩ aya bun isif, to bagai naũ ilauf, taka ĩ aya nigin momoi yef, to bagai naan ail fouf.

36 Anĩ ere, aya ã arokenein kilei, ã mogo uleya-gen, anĩ fau to momoi gef.

37 Idi ganan Deim ifanaf, aya bun disiyouf, taka ĩ aya bun isif, aya to bagai aruwauf.

38 Aya saa ilun tamal asin, aya neu oroya dõ afouf nigin sã, anĩ ere, aya sur fiyan nẽ oroya dõ afouf nigin.

39 Aya sur fiyan nẽ oroya are yeir, idi ganan ĩ ifanan taka to folõ afalauf, anĩ ere, aya idikeleya naa bun alesnẽdiyof.

40 Neu Dei nẽ oroya anĩ, taka ĩ Naal ile fen, ĩ nigin momoi yef, mata faimud ibodkeleya yalouf, idikeleya naa bun aya alesnẽf.”

41 Od enei Juda tamo karĩ de fen, ĩ nigin nauseir den, ere nigin, Jesus iron, “Aya bret saa ilun tamal asin.”

* **6:31:** Eksodas 16:4; Nehemaia 9:15; Sam 78:24, 25

42 Idi diron, “Eĩ Jesus sã de? Josef naal, in sina tama ado ada keleĩ. Naig fe di, ĩ irok, ‘Aya saa ilun tamal asin’?”

43 Jesus solof iron, “Ã aug to nauseir gouf.

44 Taka yogon oroyam, aya wageun isiya kisi feleya sã, anĩ ere, Dei aya sur fiyan inim, ĩ namen kabĩ yale fen, aya garan irou isiyouf. Age fe di, idikeleya naa bun, aya ĩ alesnẽf.

45 Profet neid itotoya bun eig ye yenek, ‘Idi ganan Negurem ifelnẽdiyof.’† Taka ĩ Dei karĩ fiye ken, ĩ bun keleĩ yalef, aya bun isidig.

46 Taka nem Dei to ilen, Negur bunem isin im dogol. ĩ yogo dogol Dei ilen.

47 Aya ã momoi bagai arokeneik, taka ĩ momoi yef, mata faimud ibodkeleya ado.

48 Aya mata nẽ bret.

49 Āgenei tubuĩ tar gerere tuan mana don, anĩ ere, idi gare den.

50 Anĩ ere, bret enei saa ilun tamal isif, are tamo yãf, to laa fouf.

51 Aya mata ibodõya bret, are saa ilun tamalem isin. Taka ĩ bret enei yoko, ĩ mata faimud ibodõf. Bret enei aya bouwau, are teneub ganan bun, tamo kayau mata dalouf nigin afenẽdiyof.”

52 Age ye di, Juda tamo dogo dogol fatuk bagai luwa diroun, “Naig fe fen, tamo enei yogon bouwa ifanada tãf?”

53 Jesus idi irokenẽdin, “Aya ã momoi bagai arokeneik, ã Tamo Naal nẽ bouwa to wãgauf, in naud to wãgauf are, ã namein mata to ibodok.

† 6:45: Asaia 54:13

⁵⁴ Taka ï neu bouwau yokon, neu naudou yoko, ï mata faimud ibodkeleya ado, anï aya fau idikeleya naa bun alesnëf.

⁵⁵ Ere nigin, neu bouwau are saaf bagai, neu naudou are naan bagai.

⁵⁶ Taka ï neu bouwau yokon, neu naudou yoko, ï aya nameun ibodok, aya ï namen abodok.

⁵⁷ Mata ibodōya Dei aya sur fiya di, aya Dei bunem mata abodok gen, taka ï aya yōyaf, aya bunem mata ibodōf.

⁵⁸ Bret enei saa ilun tamal isin. Āgenei tubuï tar mana don are gare desin, anï ere, taka ï bret enei yoko, faimud mata ibodkalauf.”

⁵⁹ Ī od enei Kapenaum taun an, Juda neid uub fō bun ifelneïd fen, wogō yen.

In Dō Fiya Tar Musei Jesus Ditornen

⁶⁰ Od enei karï de fen, in dō fiya tar musei diron, “Ifelnadaf eï totol bagai. Aim anï keleï youf?”

⁶¹ In dō fiya tar od enei nigin nauseir de di, Jesus anï keleï ken, idi irokenëdin, “Od enei ā morō ifeneik de?

⁶² Ba, Tamo Naal ï ibodon nē kel isel mog ulogouf are, ā ere kisi gouf?

⁶³ Awa Uurem mata ifenëdig, bouwa are gorō. Od aya wogō ayein are Uur, od anï mata ifenëdig.

⁶⁴ Anï ere, ā tunï momoiya sā.” Ere nigin, Jesus idi nigin gariya bun keleïn, aiyaim ï nigin to momoi den, aim ï nigin kiwai inouf.

⁶⁵ Ī od tobol fe iron, “Anï nigin, aya od enei arokenein, Dei ï nigin wau to yalouf, ï aya bun isiya kisi feleya sā.”

⁶⁶ Od enei bunem, in dō fiya tar musei keku den, baban Jesus to dō difiyen.

⁶⁷ Jesus in dō fiya tar tuwelf to fedin, “Ãg aya utornag ulagauf de?”

⁶⁸ Simon Pita solof iron, “Odug, amã ai bun malauf? Õ mata faimud ibodkeleya nē od ado.

⁶⁹ Amã momoi mau fen, keleĩ, õ anĩ Negur nē Fateul.”

⁷⁰ Age ye di, Jesus idi irokenēdin, “Tuwelf ã ayam to agirnein de? Anĩ ere, ã atun taka are Satan.”

⁷¹ (Ī Judas, Simon Iskariot naal nigin kisif fen, iron. Idi tuwelf anĩ taka Judas, fau dum Jesus kiwai ifenen.)

7

Jesus Salafat Nē Sifa Bun Ilen

¹ Enei dumen, Jesus Galili an iyon, Judia distrik so fiyen, ere nigin, an Juda tamo ĩ dukesiyouf nigin ololo difen.

² Anĩ ere, Juda neid Salafat nē Sifa naa melsã di,

³ Jesus tura tarem ĩ dirokenen, “Õ ein utor ken, Judia ulauf, ago di, ogon dō fiya tar, memelik uno di, dilouf.

⁴ Tamo taka ĩ, tamo kayau meleid bun mala yaor wõ you fenē, ĩ iminēyan kabĩ to yaledig. Õ eneidi agof, õ ogo tamo kayau ganan ufelnēdiyof.”

⁵ Ī yogon tura tar bagaig, ĩ nigin to momoi den.

⁶ Anĩ nigin, Jesus idi irokenēdin, “Aya neu sain bagai fau isiya sã, ã nigin sain ganan kisi feleya bagai.

⁷ Tenebur tamo kayau idi, ã to kiwai difeneik, aya nigin kiwai, ere nigin, ereb sane age difef anĩ kurõ afesidig.

⁸ Æ Sifa bun ulagauf, aya nigin fau Sifa enei bun to eselauf, ere nigin, neu sain bagai fau isiya sã.”

⁹ Jesus od enei wogõ yel fen, Galili distrik an ibodon.

¹⁰ Anĩ ere, tura tar Sifa bun diselel mog, ãg iselen, anĩ ere, mala yaor sã, iminẽyan.

¹¹ Sifa bun, Juda tamo idi, ã nigin meleid dino fen, to difen, “Tamo are nain?”

¹² Tamo kayau atun, ã nigin fatuk bagai kosesẽ kurã den. Tunĩ diron, “Ï tamo biya.”

Tunĩ solo de diron, “Eo, ã tamo kayau idegnẽdidig.”

¹³ Anĩ ere, taka nem ã nigin yaor to kurõ fesin, ere nigin, idi Juda tamo nigin kumĩ den.

Jesus Sifa Bun Ifelnẽdin

¹⁴ Sifa mogo atusil ifar mog, Jesus tempel modoũ bun isel fen, od ifelnẽdin.

¹⁵ Juda tamo idi terẽ de fen, diron, “Tamo enei tai fiya yaleya sã mog, naig fe fen, keleĩ eig fiya ado?”

¹⁶ Jesus solof iron, “Neu ifelnẽya are neu sã, aya sur fiyan ã bunem isif.

¹⁷ Taka ã Negur nẽ oroya dõ fiya nigin orof are, neu ifelnẽya Negur bunem isif be, aya neu oroya nem wogõ auf be anĩ, ã keleĩ youf.

¹⁸ Taka ã yogon kisim wogõ yef are, ã yogo yana yaleseya nigin age fef, anĩ ere, taka ã sur fiyen nẽ yana yaleseya nigin kabĩ yalef, tamo are momoi nẽ. Ï bun idegẽya taka sã.

19 Moses lo anĩ to ifenein de? Anĩ ere, ã atun, taka nem lo to dõ fedig. Ere nigin ã aya unakesigouf nigin ago gef?”

20 Tamo kayau solo de diron, “Õ kaa sane ado. Aim õ inokesiyouf nigin age fef?”

21 Jesus idi irokenēdin, “Aya memelik taka ano di, ã ganan terē gen.

22 Anĩ ere, Mosesem mulũ ileya ifenein nigin, ã kesu Sabat naa bun mulũ ileya wenēgedig (mulũ ileya are, Moses bunem to isin, teneub te bunem isin).

23 Moses nē lo to wal gouf nigin, Sabat naa bun kesu nē mulũ ileya wenēgedig, ere nigin aya Sabat naa bun, tamo bou adok el afe di, ã aya nigin nameĩ sanedig?

24 Mala yaor anĩ dogol uleg fen, to es gei, tutuk bagai el ge, es gei.”

Jesus Anĩ Kristus De?

25 Sain anĩ bun, Jerusalem tamo kayau tunĩ diron, “Tamo enei are idi ĩ dukesiyouf nigin age difef anĩ sã de?

26 ĩ de yeir, mal atun wogõ ye di, ereb od taka to dirokenek. Mudur adodo idi, ĩ anĩ Kristus ya anĩ mogo tutuk keleĩ de?

27 Anĩ ere, tamo enei nain be tamal, are amã keleĩ. Sain Kristus isiyouf, taka nem ĩ nainenem be isif to keleĩ youf.”

28 Age de di, Jesus fau tempel modoũ bun ifelneĩd fen, iweig iron, “Are de, ã aya nigin keleĩ, aya nainenem asin are ã keleĩ. Aya ein neu oroyam to asin, anĩ ere, ĩ aya sur fiyan are momoi. ã ĩ keleĩ sã,

²⁹ anĩ ere, aya ĩ keleĩ, ere nigin, aya ĩ bun tamal, im aya sur fiyan.”

³⁰ Od enei bun, idi ĩ dirounēf nigin age difen, anĩ ere, taka nem ĩ bun ima to inon, ere nigin, yogon sain fau isiya sã.

³¹ Anĩ ere, tamo kayau musei fau ĩ nigin momoi de fen, diron, “Sain Kristus isiyouf, ĩ memelik tamo enei inodif anĩ wal fiya inodiyouf de?”

³² Tamo kayau ĩ nigin age de, kosesē kurã de mog, Farisia tamo idi karĩ den. Age de fen, pris odudug Farisia geid, tempel lo fiya tamo Jesus dalouf nigin sur difedin.

³³ Jesus iron, “Aya ã geid sain modeg tabodok, age afe fen, aya ĩ aya sur fiyan bun alauf.

³⁴ ã aya umirnagauf, anĩ ere, ã to fotou wiya-gauf. Aya abodõf nē an, ã isiya kisi feleya sã.”

³⁵ Juda tamo abob dirokenen, “Tamo enei nari bagai ile di, anĩ ada ĩ to fotou tafouf? Ada neda tamo kayau firagagaũ difen, Grik tamo kayau atun dibodok nē an, ĩ ile fen, Grik tamo kayau ifelnēdiyof de?

³⁶ Ere gariya nigin ĩ iron, ‘ã aya umirnagauf, anĩ ere, ã to fotou wiyagauf. Aya abodõf nē an, ã isiya kisi feleya sã?’”

³⁷ Sifa naa odug idikeleya bun, Jesus ifar fen, iweig iron, “Taka ĩ naan ail fouf, aya bun isi fen, naan yãf.

³⁸ Taka ĩ aya nigin momoi yef, Negur nē Itotoya iron kilei, warur naan ĩ namenem ulo ulõ yef yenēf.”

³⁹ ĩ od enei Awa Uur nigin wogõ yen, are idi Jesus nigin momoi den anidi fau dalouf. Sain anĩ

bun, Awa Uur isiya san, ere nigin, Jesus fau fula fiya medeīya yaleya sã.

⁴⁰ Od enei karī de fen, tamo kayau tunī diron, “Momoi bagai, tamo enei Profet ada tari tafef anī.”

⁴¹ Tunī diron, “Ī Kristus.”

Tunīg diron, “Kristus ouf are, naig fe fen, Galilim isiyouf?”

⁴² Kristus Dawid nē ibor bunem, Betlehem taun Dawid ibodon nē anenem isiyouf, anī Negur nē Itotoya to irok de?”

⁴³ Anī nigin, tamo kayau Jesus nigin fara furu difen.

⁴⁴ Tunī Jesus ka difiyēf nigin age difen, anī ere, taka nem ĩ bun ima to inon.

Juda Neid Mudur Adodo Momoiya Sã

⁴⁵ Tempel lo fiya tamo idi, pris odudug Farisia tamo gedin keku de dile di, to difedin, “Ere nigin ã ĩ to urou usigel?”

⁴⁶ Tempel lo fiya tamo solo de diron, “Taka nem, tamo enei wogō yedig gen to wogō yedig.”

⁴⁷ Farisia tamo solo de diron, “Ī āg idegnein de?”

⁴⁸ Mudur adodo Farisia tamo geid atun, taka ĩ nigin momoi yen de?

⁴⁹ Sã, anī ere, tamo kayau eneidi idi lo keleī sã, idi Negurem gelu fedif.”

⁵⁰ Nikodemus, idi neid taka, tetunem Jesus garan ilen, ĩ irokenēdin,

⁵¹ “Ada neda lo bun, taka ĩ ereb age fef anī iley a nigin ketem karī tafiye ken, es tafedig. Age fiya sã de?”

⁵² Idi solo de diron, “Ōg Galili tamal de? Umir ken, fau keleĩ youf, profet taka Galilim to isif.”

[Itotoya tunĩ kulu bagai od gariya dino fen, ditoton anĩ bun, Jon 7:53-8:11 to ibodok.]

⁵³ Age de fen, idi mugu mugu dogo neid fonõ fonõ dilen.

8

¹ Anĩ ere, Jesus Moul Arei bun iselen.

² Bonimeĩ mumurei ado, ã baban tempel modoũ bun wõ yen, an tamo kayau ganan guru de salili difiyẽ di, ã ifelnẽdiyof nigin ibodon.

³ Lo ifelnẽdiya tamo Farisia tamo geid idi, kayau taka noli ye mog, dale dirou disi, guru fiya mala bun dinenẽ di, ifaren.

⁴ Age dife fen, Jesus dirokenen, “Tise, kayau enei noli tobonunã ino di, malel.

⁵ Lo bun, kayau age fediya meein tulu fiya nigin Moses irokanaman. Gama õ ere wof?”

⁶ Idi ã bou bun od yũya nigin kor dino fen, age de, to difiyen.

Anĩ ere, Jesus obũ yeis fen, ima gegem teneub bun itoton.

⁷ Idi ã to difiyẽtu di, ã fã ye, saules fen, irokenẽdin, “Ã atun, aib taka ã mosor sãf, ã ketem kayau bun meein irãf.”

⁸ Baban ã obũ yeis fen, teneub bun itoton.

⁹ Idi od anĩ karĩ de fen, idi mugu mugu ul de, diyalelen, biyedim uyu dirou di, age de dile, Jesus kayau ifaren anĩ ado dogol ditornẽdin.

¹⁰ Jesus saules fen, kayau to fiyen, “Kayau, idi nai difef? Idi takam baban õ bun od to yuk de?”

¹¹ Kayau iron, “Odug, takam to age fef.”

Jesus iron, “Ayag õ boũ bun od to auk. Ule fen, sain enei ilauf ganan, mosor baban to uno.”

Jesus Nē Wogōya Are Momoi

¹² Jesus baban tamo kayau irokeneĩd fen, ĩ iron, “Aya tenebur enei nē fula fiya. Taka ĩ aya dō fiyauf, ĩ gugum namen to bagai iyōf, anĩ ere, ĩ mata nē fula fiya adouf.”

¹³ Age ye di, Farisia tamo idi Jesus dirokenen, “Õ ogo nigin wogō wof, anĩ nigin, ogon wogōya are, momoi be sã be anĩ yaor sã.”

¹⁴ Jesus solof irokenēdin, “Aya yug nigin wogō auf, anĩ ere, neu wogōya are momoi, ere nigin, aya nainenem asin, nain be alauf anĩ, aya keleĩ. Anĩ ere, ã, aya nainenem asin, nain be alauf anĩ, keleĩ sã.

¹⁵ Æ tamo nē tobonunã bunem es gedig, aya aib taka to es afedig.

¹⁶ Anĩ ere, aya es afouf are, neu es fiya are tutuk, ere nigin, aya mugu sã. Aya Dei inim sur fiyan ado mafaref.

¹⁷ Ægenei Lo bun itotoya irok, tamo urom wogō tekelei dinof, are momoi.

¹⁸ Aya yug nigin kurō afalaisidig, age afe di, Dei aya sur fiyan ĩ, aya nigin kurō fesidig.”

¹⁹ Age ye di, idi Jesus dirokenen, “Õ tamã nain?”

Jesus solof iron, “Æ aya nigin ado neu Dei nigineg keleĩ sã. Æ aya nigin keleim are, neu Dei nigineg keleim.”

²⁰ ĩ tempel bun kolekta inoya nē modoũ non ifelneĩd fen, od enei wogō fiyēdin. Anĩ ere, takam ĩ to ima ka fen, ere nigin, in sain fau isiya sã.

²¹ Jesus baban idi irokenēdin, “Aya atorneĩ di, ã umirnagauf, agog fen, ã ãgenei mosor bun gare gouf. Aya elef nē an, ã isiya kisi feleya sã.”

²² Anĩ bunem, Juda tamo idi diron, “Ĩ yogo bouwa yukesiyouf de? Anĩ nigin, ĩ, ‘Aya elef nē an, ã isiya kisi feleya sã,’ yef de?”

²³ Anĩ ere, Jesus tobol fe fen, irokenēdin, “Ã tenebur temeļĩ, aya ilun temelou. Ã teneub enei nē, aya teneub enei nē sã.

²⁴ Anĩ nigin, aya, ã ãgenei mosor bun gare gouf ayein. Aya yug nigin, aya im audig anĩ, to momoi gouf are, ã momoi bagai ãgenei mosor bun gare gouf.”

²⁵ Age ye di, idi ĩ to difiyen, “Õ ai?”

Jesus idi irokenēdin, “Aya aib anĩ, mogo gariya bunem arokeneik asin.

²⁶ Aya ã nigin wogōya musei ado, es fiya nigineg musei. Anĩ ere, sur fiyan ĩ, momoi bagai, anĩ nigin, ereb aya ĩ bun karĩ aun anĩ, tamo kayau tenebur ein arokenēdif.”

²⁷ Idi, ĩ Tama nigin irokenēdif ya anĩ, to kisi fokō yen.

²⁸ Anĩ nigin, Jesus iron, “Sain ã Tamo Naal walesagauf bun, aya yug nigin aya im audig anĩ, ã keleĩ youf, aya neu oroyam ereb taka to age afedig, anĩ ere, aya Dei ifelnan anĩ dogol wogō audig anĩ, ã keleĩ youf.

²⁹ Aya sur fiyan ĩ, amã urom mabodok, ĩ mugu to itornal, ere nigin, aya faimud, ereb ĩ wau al foug anĩ, age afedig.”

³⁰ Age wogō ye di, musei ĩ nigin momoi den.

Abraham Gere Tar

³¹ Jesus, Juda tamo ï momoi difiyen anidi iro-kenēdin, “Aya afelnein anī uroug tokō walagauf are, ã momoi bagai neu dō fiya tar.

³² Agog fen, ã momoi anī keleī youf, momoi anim kafī fiya bun tamal yalelneif.”

³³ Idi aiten dale dirokenen, “Amã Abraham nē ibor nē tubu tar, amã aib taka nē ferfer to mabodon. Ere wo fen, amã kafī fiya bun tamal yalelnamãya nigin urok?”

³⁴ Jesus aitedin yale iron, “Aya ã momoi bagai arokeneik, taka ï mosor inof are, ï mosor nē ferfer.

³⁵ Ferfer ï, ibor anī bun gai ibodkeleya modoũ sã, anī ere, modoũ are naal nē faimud ibodkalauf.

³⁶ Anī nigin, Naal ï kafī fiya bun tamal yalelneif are, ã momoi bagai karika lauf.

³⁷ ã Abraham nē ibor nē tubu tar are, aya keleī. Anī ere, ã aya unakesigouf nigin dodok gef, ere nigin, ã neu od nē modoũ namein to ibodok.

³⁸ Ereb aya Dei mala bun ailen anī, aya ã arokeneik, ãg erab ãgenei temeī bun karī gen anī ago gedig.”

³⁹ Idi aiten dale dirokenen, “Abraham ï tamamã.”

Age de di, Jesus iron, “ã Abraham gere tarem are, Abraham age fedin anī ago gem.

⁴⁰ Gama ã, aya Negur bun momoi anī karī au fen, arokenein anī, unakesigouf nigin naab umirēgef. Abraham ï to age fen.

⁴¹ ã temeī age fedig anī ago gef.”

Age ye di, idi Jesus dirokenen, “Amã seseirã inoya naab bun temelamã sã. Nemã Tamamã are Negur yogo dogol.”

Satan Gere Tar

⁴² Jesus idi irokenēdin, “Negur ï Temeim are, ã aya nigin wauĩ laa fem, ere nigin, aya Negur bunem asi fen, yeir afaref. Aya neu oroyam to asin, im sur fiyan.

⁴³ Ere nigin neu od nigin wauĩ to fokõ yef? Are aya wogõ auf anĩ, ã kariya kisi feleya sã nigin.

⁴⁴ Æ, temeĩ Satan nẽ, anĩ nigin, ã temeĩ nẽ oroya dõ fiya nigin oroyeik. Ï gariya bunem isin, ï yukesiya kaa, momoi to iroudig, ere nigin, ï namen momoi sã. Ereb sain ï idegẽya od wogõ yedig, ï yogon od bagai wogõ yedig, ere nigin, ï kori tamal, idegẽya tama.

⁴⁵ Anĩ ere, aya momoi anĩ wogõ audig nigin, ã to momoi wiyagedig!

⁴⁶ Æ takam, aya neu mosor anĩ tau kurõ fesiya kisi feleya? Aya momoi wogõ auf are, ere nigin ã to momoi wiyagef?

⁴⁷ Aib ï Negur nẽ, ï Negur ererb yef anĩ karĩ yedig. Æ to karĩ gef anĩ nẽ gariya are, ã Negur nẽ sã nigin.”

Jesus Yogo Nigin Iron

⁴⁸ Juda tamo aiten dale dirokenen, “Amã õ Samaria tamal, kaa sanem ironon mauf are, momoi to morok de?”

⁴⁹ Jesus solof iron, “Aya kaam to ironan, anĩ ere, aya neu Dei yana seli abidig, ã aya selu to wabigedig.

⁵⁰ Aya yug nigin fula fiya medeĩya to amirek, anĩ ere, taka ï anĩ imirek are ibodok, ï anĩ es fiya tamo.

51 Aya ã momoi bagai arokeneik, taka ã neu od irou kafĩ falauf are, ã laa to bagai gurug fouf.”

52 Juda tamo, anĩ bun Jesus dirokenen, “Gama amã keleĩ, õ kaa sanem ironon! Abraham laa fen, profeteg gare den, anĩ ere, õ, taka ã ogon od irou kafĩ falauf are, ã laa to bagai kobũf ilouf, wof.

53 Õ tamamã Abraham wal fiya de? Ì laa fen, profeteg age difen. Õ kisi wof, õ ai?”

54 Jesus aitedin yale iron, “Aya yug selu alesauf are, neu seli alef are ege. Neu Dei, ã anĩ ãgenei Negur gef, ã aya yanau yalesedig.

55 ã ã keleĩ sã, anĩ ere, aya ã keleĩ. Aya ã keleĩ sã auf are, aya ã gen idegẽya tamouf, anĩ ere, aya ã keleĩ bagai, in od dõ afedig.

56 Temeĩ Abraham ã, neu naa anĩ ilouf nigin kisif fen, wau al fen. Ì anĩ mogo ile fen, kulĩ yen.”

57 Anĩ nigin, Juda tamo Jesus dirokenen, “Õ fau yar fifti yaleya sã, anĩ õ mogo Abraham ulen de?”

58 Jesus idi irokenẽdin, “Aya ã momoi bagai arokeneik, Abraham gõ fiya sã mog, aya abodon.”

59 Anĩ nigin, idi ã meein tulu difouf nigin meein gei difen, anĩ ere, Jesus bouwa inokel fen, tempel modoũ bun tamal iya ilen.

9

Jesus Tamo Taka Mala Ifofakeleya Gõ Difiyen Anĩ El Fiyen

1 Jesus iyok ile fen, tamo taka mala ifofakeleya gõ difen anĩ ilen.

2 In dõ fiya tar Jesus to difiye, “Rabi, aim mosor ino di, ã mala ifofakeleya gõ difen, tamo enei yogo de, sina tamam de?”

³ Jesus aitedin yale iron, “Tamo eneimeg sã, sina tama adomeg sã, anĩ ere, Negur nẽ kabĩ ĩ bunem yaorouf nigin eig fiya wõ yen.

⁴ Eĩ fau gaa ado, aya sur fiyan in kabĩ talouf bagai. Bõ fau isif, sain anĩ, taka nem kabĩ yaleya kisi feleya sã.

⁵ Sain aya tenebur abodok, aya teneub enei nẽ fula fiya.”

⁶ Age wogõ yel fen, ĩ tenebur isis fen, salina buru ado falei fe fen, tamo mala bun inon.

⁷ Jesus ĩ irokenen, “Ule, Siloam naan kukor ugũ” (Siloam nẽ gariya, are ‘Sur fiyen’). Anĩ nigin, tamo ile, naan igun, agef fen, mala kelẽ yel, fõ bun isin.

⁸ In fõ tura tar ado, idi ĩ nonĩ ye mog diledig anidi diron, “Tamo de eneim ibod ken, nonĩ yedig anĩ sã de?”

⁹ Idi tunĩ diron, “Im.”

Tunĩ diron, “Im sã, taka ĩ genem.”

Anĩ ere, ĩ yogo iron, “Aya de tamo anim.”

¹⁰ Idi ĩ dirokenen, “Naig fe di, õ malã kelẽ yeledin?”

¹¹ ĩ aitedin yale iron, “Tamo yana Jesus dedig im, buru falei fe fen, malau uru bun inodin. ĩ, aya ele, Siloam naan agũf nigin irokanan. Anĩ aya ele, naan agun, age afe fen, aya malau kelẽ aun.”

¹² Idi ĩ to difiyen, “Tamo are nain?”

ĩ iron, “Aya keleĩ sã.”

Farisia Tamo Idi Mala El Fiyen Nẽ Gariya Dimiren

¹³ Idi tamo mala ifofakelen anĩ, Farisia tamo gedin dale dirou disin.

14 Jesus buru falei fe fen, tamo mala el fedin nē naa are Sabat naa.

15 Anī nigin, Farisia tamo idig, ī naig fe fen, mala kelē yedin anī to difiyen. Tamo are irokenēdin, “Ī malau buru inodin, age fe di, agun, anī aya gama kelē auf.”

16 Farisia tamo tunī diron, “Tamo enei Negur bun tamal sã, ere nigin, ī Sabat naa to dō fef.”

Anī ere, tunī diron, “Naig fe di, mosor tamo memelik age fediya inoya kisi feleya?” Anī nigin, idi fara difen.

17 Idi baban tamo mala ifofakelen anī diroke-nen, “Ī ō malã el fen anī, ō ī nigin ere wof?”

Age de di, ī iron, “Ī profet.”

18 Juda tamo idi, tamo mala ifofakeleya mala kelē yelen anī, fau to momoi den. Anī nigin, idi tamo anī sina tama diweignēdin.

19 Idi to difen, “Eī ã naaluī de? De ī anī mala ifofakeleya gō mafen gef? Naig fe di, ī gama sã mala kelē yelef?”

20 Sina tama diron, “Amã keleī, ī nemã kesu, anī ī mala ifofakeleya gō mafen.

21 Anī ere, ī naig fe fen, gama sã lo fef, aim ī mala el fedin anī, amã keleī sã. Yogo to wiyēg, ī biya, yogo nigin wogō youf.”

22 Sina tama idi, Juda tamo kumī difiyeīd fen, age de diron, ere nigin, Juda tamo idi mogo od difon, aib taka Jesus anī Kristus youf are, Juda neid uub fō bun dalelnēf.

23 Age fiya nigin, sina tama eig de diron, “Ī biya, yogo to wiyēg.”

24 Baban Juda tamo idi, mala ifofakelen anī diweigne ken, diron, “Negur yana wales fen,

momoi nē od dogol urōf, amā keleī, tamo are mosor tamal.”

²⁵ Ī solof iron, “Ī mosor ado be sã be, aya keleī sã. Tekelei aya keleī are, aya malau ifofakelen, anī ere, gama lo afedig.”

²⁶ Age ye di, idi ĩ to difiyen, “Ī ō ere naig yon? Naig fe di, ō malã birikã fedin?”

²⁷ Ī aitedin yale iron, “Aya ã mogo arokenein, anī ere, ã to karī gen. Ere nigin ã baban karī gou fenē? Āg in dō fiya tar wowã gou fenē de?”

²⁸ Age ye di, idi kono difiye ken, diron, “Ō tamo enei nē dō fiya taka! Amã are Moses nē dō fiya tar!

²⁹ Negur Moses wogō fiyen are amã keleī, anī ere, tamo enei nigin, ĩ nainenem isin areg, amã keleī sã.”

³⁰ Tamo anī aitedin yale irokenēdin, “Ago ge di, terē auf. Ī nainenem isin, ã keleī sã, anī ere, aya malau birikaū fedin.

³¹ Amã keleī, Negur ĩ mosor dinodidig anī to karī fiyēdidig, anī ere, taka ĩ Negur anini fiye ken, Negur nē oroya dō fef are, Negurem ĩ karī fiyēdig.

³² Gariya bunem isi gama, taka nem, tamo mala ifofakeleya gō difen anī birikã fedin yeya to karī yedig.

³³ Tamo enei Negur bun tamal sam are, ĩ ereb taka to naig fem.”

³⁴ Age ye di, idi diron, “Ō mosor barikã gō diyon, naig fe di, ō amã ufelnamak?” Age de fen, idi ĩ mayarē diru dirã di, isin.

Uur Bun Mala Ifofakeleya

³⁵ Jesus, idi tamo anĩ serẽ diran yeya anĩ karĩ yen. Jesus ĩ fotou fiye ken, iron, “Õ Tamo Naal nigin momoi wof de?”

³⁶ Tamo to fen, “Odug, ai anĩ ĩ? Urokana di, aya ĩ nigin momoi auf.”

³⁷ Jesus iron, “Õ gama ĩ ulel, de ĩ anĩ urom wogõ gef.”

³⁸ Age ye di, tamo iron, “Odug, aya momoi auf.” Agef fen, ĩ Jesus seli yabin.

³⁹ Jesus iron, “Es fiya nigin aya tenebur ein asin, are mala ifofakeleya meleid kelẽ youf, age fe di, idi meleid kelẽ yef, are meleid ifofakalauf nigin.”

⁴⁰ Farisia tamo tunĩ Jesus geid difaren anĩ, agef wogõ ye di, karĩ de fen, to difen, “Ere? Amãg malamã ifofakeleya de?”

⁴¹ Jesus iron, “Ã momoi bagai meleĩ ifofakeleyam are, ã mosor sam, anĩ ere, gama ã malamã kelẽ yef gef, anĩ nigin, ãgenei mosor fau ibodok.

10

Sipsip Lo Fiya Tamo Yogon Sipsip Geid

¹ “Aya momoi bagai arokeneik, tamo taka ĩ, sipsip nẽ kauwor bobog bunem to ilauf, anĩ ere, naab taka bunem gar ye isilauf are, ĩ bẽ tamo, bẽ yaledig.

² Tamo ĩ bobog bunem ilef are, ĩ yogo sipsip marau.

³ Lo fedig tamo ĩ bobog kãf kenẽdidig, age fe di, sipsip ĩ ait karĩ dedig. ĩ yogon sipsip yana yaleid fen, mayarẽ guri feid, irouledig.

⁴ Sain ï yogon ganan mayarẽ guri feid iroule fen, ï ketem uyu ìledig, age fe di, yogon sipsip dõ difedig, ere nigin, idi yogon ait keleĩ.

⁵ Anĩ ere, idi tamo urug to dõ difedig, idi ï mã diyawauf, ere nigin, ï ait urug nigin idi keleĩ sã.”

⁶ Jesus yaab od enei nem wogõ fiyẽdin, anĩ ere, ï idi ereb gariya nigin irokenẽdin anĩ, idi to kelein.

⁷ Anĩ nigin, Jesus baban iron, “Aya ã momoi bagai arokeneik, aya sipsip neid bobog.

⁸ Ganan uyulil disin are, idi bẽ tamo, bẽ daledig, anĩ ere, sipsip idi to karĩ difiyẽdin.

⁹ Bobog are aya, taka ï aya bunem isiyouf are, mata kel yalouf. Ì namen isi fen, ulõ yeis ilauf, agef fen, fisir yõya nẽ fotou fouf.

¹⁰ Bẽ tamo are bẽ nigin, yukesiyouf nigin ado, narĩ fouf nigin dogol isif, aya idi mata dale fen, barikãuf nigin asin.

¹¹ “Aya sipsip lo fiya tamo biya, sipsip lo fiya tamo biya, yogon mata sipsip nigin itorõdig.

¹² Oroi tamo are ï sipsip marau sã. Anĩ nigin, ï gaũ kuĩ isi di, ile fen, sipsip itorarã iyadig. Age fe di, gaũ kuĩ sipsip kaka feid fen, firagagaũ fedidig.

¹³ Tamo are iyadig, ere nigin, ï oroi tamo, sipsip nigin to karĩ yedig.

¹⁴ “Aya sipsip lo fiya tamo biya, aya neu sipsip keleĩ, neu sipsip idi aya keleĩ,

¹⁵ are Dei ï aya keleĩ, aya Dei keleĩ gen. Anĩ nigin, aya neu mata sipsip nigin atorok.

¹⁶ Aya sipsip tunĩ ado, are sipsip kau enei bun temeleid sã, aya idig de guri afeid, arou asiyouf. Idig aitou karĩ douf, age fe di, idi uũ tekelei, sipsip lo fiya tamo tekelei youf.

17 Neu Dei, aya nigin wau laa fef nē gariya are, aya neu mata baban kel yalouf nigin anī atorok.

18 Taka nem neu mata to son fiyauf, anī ere, aya neu oroyam neu mata atorok. Aya neu mata itorōya nigin megeir ado, kel yaleya nigineg megeir ado. Od enei neu Dei bun tamal alen.”

19 Juda tamo od enei nigin baban fara difen.

20 Musei idi diron, “Ī kaa sane ado, agef fen, wadak. Ere nigin ĩ karī wiyēgef?”

21 Anī ere, tunī diron, “Wogōya enei are, tamo kaa sane ado nē sã. Kaa sane ĩ mala ifofakeleya birikã feleya kisi feleya de?”

Juda Tamo Idi To Momoi Den

22 Sain anī bun, Negur bun Kel Inoya nē Sifa naa Jerusalem wō yen. Are saneya sain.

23 Anī Jesus tempel modoū bun, Solomon nē Waranda dō fef iyon.

24 Juda tamo guru de, Jesus salili difiye ken, dirokenen, “Sain ganī amã lo wamã di, nene mauf? Õ Kristus ouf are, amã el wo, faded wamãf.”

25 Jesus aitedin yale irokenēdin, “Aya mogo arokenein, anī ere, ã to momoi gef. Memelik neu Dei yana nem anodif, are aya nigin irok.

26 Anī ere, ã to momoi gef, ere nigin, ã neu sipsip sã.

27 Neu sipsip aya aitou karī dedig, aya idi keleĩ, anī nigin, idi aya dō difiyadig.

28 Aya idi mata faimud ibodkeleya afenēdidig, age afe di, idi to bagai inanakalauf. Takam idi imaun tamal to sosoin fiyauf.

²⁹ Neu Dei idi aya ifanan ĩ, erab erab ganan wal fiya. Takam idi neu Dei ima bun tamal son fiya kisi feleya sã.

³⁰ Aya Dei ado tekelei.”

³¹ Juda tamo baban ĩ meein tulu difiyẽf nigin, meein gei difen.

³² Anĩ ere, Jesus idi irokenẽdin, “Aya Dei bun tamal, ã memelik odudug musei afelnein. Anidi atun nanĩ anĩ nigin, ã aya meein tulu wiyagau fenẽ?”

³³ Juda tamo aiten dale diron, “Amã anidi taka nigin meein to tulu mayõf, anĩ ere, Negur kono fiya nigin, ere nigin, õ tamo maug anĩ, ‘aya Negur’ wof.”

³⁴ Jesus idi aitedin yale irokenẽdin, “Ãgenei Lo bun itotoya anĩ to ibodok de, ‘Aya aron, ã waitou’*?”

³⁵ Negur nẽ od idi bun isin are, Negur idi anĩ waitou yen. Negur nẽ Itotoya are narĩ fiya kisi feleya sã.

³⁶ Age yen ouf are, Dei yogon bagai igrina fen, ein tenebur sur fiyan anĩ, aya Negur Naal aul anĩ, ere nigin aya kono afel wiyagef?

³⁷ Aya erab neu Dei age fedig anĩ, to age afef are, aya to momoi wiyagauf.

³⁸ Anĩ ere, aya age afe di, ã neu od to momoi goufeg, memelik anodif anĩ momoi gouf, anĩ bunem Dei aya bun ibodok, aya Dei bun abodok ya anĩ, ã karĩg fen, keleĩ youf.”

³⁹ Idi baban Jesus ka difiyẽf nigin age difen, anĩ ere, ĩ oreis iyawon.

* **10:34:** Sam 82:6: Negur ĩ od enei Juda nẽ es fiya tamo ifenẽdin.

⁴⁰ Agef fen, Jesus ĩ, Jordan naan sitakã, uruwa bun Jon naan igunēdin modoũ bun, kel ile, an ibodō di,

⁴¹ tamo kayau musei ĩ garan disi diron, “Jon memelik taka to inon, anĩ ere, Jon tamo enei nigin wogō yen ganan, are momoi.”

⁴² Age de fen, an musei idi Jesus nigin momoi den.

11

Lasarus Laa Fen

¹ Gama tamo Lasarus dedig dagin. ĩ Betani tamal, Maria ĩ tura Marta ado neid fonō.

² Maria de anim, kulu moul sumeĩ biya ado, Jesus bun fi fel fen, fatiyam Jesus ye waĩ fen. ĩ main Lasarus gama dagi yenek.

³ Anĩ nigin, main tar Jesus garan od sur difen, “Odug, ĩ nigin waũ laa fedig are dagi.”

⁴ Jesus ĩ enei karĩ ye fen, iron, “Dagi eneim to laa ilauf, are Negur nē fula fiya medeĩya nigin, anĩ bunem, Negur Naal yana dalesauf.”

⁵ Marta, tura ado, maineid Lasarus nigin, Jesus wau laa fen.

⁶ Anĩ ere, Jesus ĩ Lasarus dagi yenek ya karĩ ye fen, ĩ ibodon nē an baban naa uru ibodon.

⁷ Anĩ bure fele di, Jesus in dō fiya tar irokenēdin, “Ada Judia distrik baban keku tagauf.”

⁸ Anĩ ere, idi diron, “Rabi, ō gama bagai Juda tamo meein tulu diyōf nigin age difen, anĩ ō an kel ulau fenē de?”

⁹ Jesus irokenēdin, “Gaa tekelei bun aua tuwelf to ado de? Anĩ ege aa luwan to ilalauf. Tamo ĩ gaa

ado iyok, ï ye to tũ fedig, ere nigin, ï teneub enei nẽ lalan anim lo fedig.

¹⁰ Sain ï bõ iyõf are, ye tũ fouf, ere nigin, ï lalan sã.”

¹¹ Enei irokel fen, Jesus idi irokenẽdin, “Neda mou Lasarus ï mulã yenek, anĩ ere, aya turĩ afiyẽf nigin an elef.”

¹² In dõ fiya tar Jesus solo de dirokenen, “Odug, ï yenek are, ï fau karikauf.”

¹³ Lasarus laa fen nigin Jesus iron, anĩ ere, in dõ fiya tar kisi difen, ï mulã yenẽya maug bagai nigin irok den.

¹⁴ Anĩ nigin, Jesus idi faded feid, irokenẽdin, “Lasarus laa fen.

¹⁵ Å nigin au fen, aya an to abodon anĩ nigin, aya wau al fef, ere nigin, anĩ bunem ã momoi gouf. Anĩ ere, ada ï gein talauf.”

¹⁶ Anĩ nigin, Tomas Didimus dedig, dõ fiya tar tunĩ ganan irokenẽdin, “Weim gare tauf nigin, adag talauf.”

Jesus Lasarus Main Tar Waud Wã Fen

¹⁷ Sain Jesus ile wõ yen are, Lasarus mogo matmat bun naa fo ilelen anĩ karĩ yen.

¹⁸ Betani are Jerusalem melsã, tri kilomita age fiya.

¹⁹ Juda tamo kayau musei, Marta Maria ado maineid laa fen anĩ, waud yo difouf nigin idi gedin disin.

²⁰ Marta Jesus isif ya karĩ ye fen, Jesus fotou fouf nigin ilen, anĩ ere, Maria ï fõ bun ibodon.

²¹ Marta Jesus irokenen, “Odug, õ ein udobom are, mainou to laa fem.

22 Anĩ ere, aya keleĩ, gamag õ ereb taka nigin Negur urokeněf are, ifonõf.”

23 Jesus Marta irokenen, “Ně main baban kel fã youf.”

24 Marta Jesus aiten yale iron, “Aya keleĩ, idikeleya naa kel fãya sain bun, ĩ baban kel fã youf.”

25 Jesus ĩ irokenen, “Aya dogol kel fãya ně ado mata ně. Taka ĩ aya nigin momoi yef are, ĩ mata ibodõf, laa foufeg, ĩ mata ibodõf.

26 Taka ĩ mata ibod ken, aya nigin momoi yef are, ĩ to bagai laa fouf. Õ enei momoi wof de?”

27 Marta Jesus irokenen, “Momoi, Odug, aya momoi auf, õ Kristus, Negur Naal, teneub enei bun usin.”

28 ĩ agef irokel fen, ĩ kel ile, tura Maria iweigne ken, mugun irokenen. ĩ iron, “Tise yeir, ĩ iweignok.”

29 Maria od enei karĩ ye fen, ĩ kaisã bagai fã yale, Jesus garan ilen.

30 Jesus fonõ wõya sã, ĩ fau Marta fotou fiyen modoũ anĩ bun ibodon.

31 Juda tamo kayau, Maria geid, fõ bun dibod ken, ĩ wau wã difenen, ĩ kaisã bagai fã yale, ulõ yeis ile di, dile fen, ĩ matmat bun inã yalouf nigin ilef de fen, dõ difiyen.

32 Sain Maria Jesus ibodon ně modoũ anĩ bun wõ ye, Jesus ile fen, ĩ ye gariyan kubũ ye fen, iron, “Odug, õ ein ubodom are, mainou to laa fem.”

33 Sain Maria inã yalen ado, Juda tamo kayau Maria geid disin idig inã dalen, Jesus anĩ ile fen, wau fatuk bagai gudũf morõ fen.

34 Jesus to fen, “ĩ nain mũ gen?”

Idi diron, “Odug, usi fen, ule.”

³⁵ Jesus ï inã yalen.

³⁶ Age fe di, Juda tamo kayau diron, “Ulegef, ï nigin fatuk bagai wau laa fen anï!”

³⁷ Anï ere, idi tunï diron, “Ï tamo mala ifofakeleya birikã fedin, tamo eneig laa bun ileyã nigin katï feleya to kisi feleyan de?”

Jesus Lasarus Laa Bun Tamal Turï Fen

³⁸ Jesus baban wau fatuk bagai gudũf fen, matmat bun isin. Matmat are ku, meein nem bobog katï difelen.

³⁹ Jesus iron, “Meein waleleg.”

Marta, laa tamo nẽ main iron, “Anï ere, Odug, are gama waai sane, ere nigin, ï an naa fo ibodon.”

⁴⁰ Age ye di, Jesus iron, “Õ momoi wof are, Negur nẽ fula fiya medeïya ulouf, to age ayon de?”

⁴¹ Anï nigin, idi meein are dalelen. Age dife di, Jesus itad fen, iron, “Dei, õ aya karï wiyal nigin, õ de ayok.

⁴² Aya kelein, õ faimud aya karï wiyadig, anï ere, aya tamo kayau yeir difaref nigin od enei orom, are idi onom aya sur wiyã anï momoi douf nigin.”

⁴³ Jesus od enei wogõ yel fen, ait odug nem iwegin, “Lasarus, ulõ weis!”

⁴⁴ Laa tamo, ye, ima gabar masak nem filu difen ado, nawa gabarem sile difen ulõ yesi di, Jesus idi irokenedin, “Gabar waleleg fen, utornẽge di, ile.”

Jesus Dukesiyouf Nigin Od Difon

(Matyu 26:1-5; Mak 14:1, 2; Luk 22:1, 2)

⁴⁵ Anĩ nigin, Juda tamo kayau musei Maria gein disin, Jesus ereb age fen anĩ dile fen, ã nigin momoi den.

⁴⁶ Anĩ ere, idi tunĩ Farisia tamo gedin dile fen, Jesus ereb age fen anĩ dirokenēdin.

⁴⁷ Anĩ nigin, pris odudug Farisia tamo geid, katō difouf nigin Juda uyu irouya neid kaunsel guru fiya diwegin.

Idi diron, “Ada naig tafouf? Ere nigin, tamo enei memelik musei inodif.

⁴⁸ Ada lo tafe di, ã enei eig fef ilauf are, tamo ganan ã nigin momoi douf, age dife di, neda ibodōya ado teneub, Rom tamom disi dalouf.”

⁴⁹ Age de di, idi atun taka, yana Kaiafas, ã yar anĩ bun pris neid mudur ibod ken, wogō yen, “Ã ereb taka keleĩ sã!

⁵⁰ Tamo kayau ganan inanakalauf ban, tamo tekeleim tamo kayau nigin laa fouf, are ã nigin deuf anĩ, ã to kisi gef.”

⁵¹ ã yogon kisi bunem od enei to iron, anĩ ere, ã yar anĩ bun pris neid mudur ibodon nigin, profet od wogō yen, Jesus Juda tamo kayau ganan nigin laa fouf yen.

⁵² Are Juda tamo kayau nigin dogol sã, Negur gere tar firagagaũ difen anidig, guri feid irusi kuru fedi di, idi tekelei youf nigin, Jesus laa fouf yen.

⁵³ Anĩ nigin, naa anĩ bunem ilen, idi Jesus dukesiyouf nigin naab dimiren.

⁵⁴ Age dife di, Jesus ã, Juda tamo kayau meleid bun mala yaor to iyon, ã an iminkele fen, teneub akor taka, gerere tuan melsã, fonõ yana Efraim ilen, an yogon dõ fiya tar geid dibodon.

⁵⁵ Sain anĩ Juda neid Pasa naa melsã, musei fonõ fonõ temeleid, dogo neid nonorou lilik fiya nigin, Pasa naa wõya sã mog, Jerusalem diselen.

⁵⁶ Idi Jesus nigin meleid dinof diyon. Idi tempel modoũ bun difar fen, abob to difen, “Ã ere kisi gef? Ñ Sifa bun to isiyouf de?”

⁵⁷ Anĩ ere, pris odudug Farisia tamo geid, taka nem Jesus nain be ibodok ya anĩ ile fen, irokenēdi di, dirounēf nigin wedereid diroun.

12

Betani Oun Jesus Ye Bun Maria Moul Fi Felen (Matyu 26:6-13; Mak 14:3-9)

¹ Pasa nē naa wõya nigin, naa sigis fau ibod mog, Jesus Betani wõ yen, an Lasarus ibodon, ñ Jesusem laa bun tamal turĩ fiyen.

² An Jesus nigin waud el fe fen, bõ saaf dabin, anĩ Marta aruna yalen. Idi Jesus geid tebol bun dibodon atun, Lasarus ibodon.

³ Age de mog, Maria moul sumeĩ biya, hap lita nad nem dinon, are moni odug nē anĩ yale fen, Jesus ye bun fi fel fen, fatiyam ye waĩ fen. Age fe di, moul sumeĩ biyam, fõ anĩ ino yalen.

⁴ Anĩ ere, Judas Iskariot, in dõ fiya taka, fau dum im Jesus kiwai imeid bun inouf, im iron,

⁵ “Ere nigin moul sumeĩ biya enei, na nigin sur fe fen, moni anĩ maleg tamo to ifenēdiyam? Are yar tekelei bun, kabĩ tamo nē mala yaledig kilei.”

⁶ Ñ maleg tamo nigin kisif fen, enei to iron, ñ yogo bē tamo nigin age yen. Ñ moni nē kodol lo fiya tamo, moni nē kodol bun dinodig are bē yaledig.

⁷ Anĩ nigin, Jesus iron, “Kayau are utornĕg, ĩ aya mũ difiyauƒ naa nĕ nigin, moul sumeĩ biya enei irouwauf.

⁸ Maleg idi, ā geid sain faimud ubodōgouf, anĩ ere, aya, ā geid sain faimud to tabodōf.”

⁹ Age de mog, Juda tamo kayau musei, Jesus an ibodok ya kelei ken, disin, are ĩ nigin dogol sã, Lasarus Jesusem laa bun tamal turĩ fiyen ĩg dilouf nigin.

¹⁰ Anĩ nigin, pris odudug Lasarus ĩg dukesiyouf nigin naab dimiren,

¹¹ ere nigin, Lasarus bunem, Juda tamo kayau musei Jesus garan dile fen, ĩ nigin momoi den.

Jesus Tamo Yana Ado Gen Jerusalem Ilen

(Matyu 21:1-11; Mak 11:1-11; Luk 19:28-40)

¹² Naa anĩ ile di, tamo kayau musei Sifa bun disin, Jesus Jerusalem isif ya anĩ karĩ den.

¹³ Idi pam aarau anã aarau gen anĩ guri de, Jesus tarabã difiyĕf nigin dile fen, diweig diron, “Hosiana!”*

“Odug yana bunem isif, ĩ el fiya ado!”†

“Israel neid King, ĩ el fiya ado!”

¹⁴ Jesus donki naal fotou fe fen, teten ibodon, are Negur nĕ Itotoya eig ye irok kilei,

¹⁵ “To kumĭg, Saion nĕ tamo kayau, uleg, āgenei king,

donki naal teten ibod ken, isif.”‡

¹⁶ Uruwa bagai, in dō fiya tar, enei ganan nigin wedereid fokōya san. Dum Negur Jesus fula fiya

* **12:13:** Anĩ nĕ gariya, ‘Usenamã!’ Od anĩ tamo kayau Negur yana yaleseya nigin wogō dedig. † **12:13:** Sam 118:25, 26

‡ **12:15:** Sekaraia 9:9

medeïya ifenē di, enei ï nigin ditoton ado, enei tamo kayau ï bun age difen anï, wedereid fokō yen.

¹⁷ Tamo kayau Jesus geid difar fen, ï Lasarus matmat bun tamal iweigne ken, laa bun tamal turï fe di, lo difen idim wogagā def, dile di, od iyokelen.

¹⁸ Tamo kayau musei, Jesus memelik anï inon karï den nigin, ï fotou difiyēf nigin dilen.

¹⁹ Age dife di, Farisia tamo idi abob dirokenen, “Ulegef, ada kabï ege talegef. Lo gouf are, tamo kayau ganan ï dō difiyek!”

Jesus Yogon Laa Nigin Iron

²⁰ Sifa bun Negur yana dalesauf nigin diselen idi atun, Grik tunï difaren.

²¹ Idi Filip Betsaida tamal Galili teneub bun, ï garan disi fen, to difiyē diron, “Tamo biya, amā Jesus mailau fenē.”

²² Age de di, Filip ile, Endru iroken ken, uru-wom Jesus dirokenen.

²³ Jesus idi irokenēdin, “Negur Tamo Naal fula fiya medeïya ifenēf nigin, sain anï mogo yeir isil.

²⁴ Aya ā momoi bagai arokeneik, wit faat taka teneub bun kubū ye fen, to burauf are, faat tekelei dogol agef ibodōf, anï ere, ï burauf are, faat musei wowā douf.

²⁵ Tamo ï yogon mata nigin wau laa fef are, ï mata anï itornēf, anï ere, tamo ï teneub enei bun, yogon mata atorok bagai ye fen, itorok are, ï ironnek ile, mata ibodkeleya bun ilauf.

²⁶ Taka ï aya arunau yalef, ï aya dõ fiyauf bagai. Aya abodok nẽ an, neu kabĩ tamo ïg an ibodõf. Taka ï arunau yalef, neu Dei ï yana yalesauf.

²⁷ “Gama neu wau morok, anĩ aya ere auf? ‘Dei sain enei bun usenna,’ auf de? Sã, gariya enei nigin bagai, sain enei bun asin.

²⁸ Dei ogo yanã selĩ kulõ!”

Age ye di, ait taka saa ilunem isin, “Aya mogo anĩ selu abin, aya baban anĩ selu abiyouf.”

²⁹ Tamo kayau an difaren anĩ karĩ de fen, diren, kolimei den, tunĩ diren, engel takam wogõ fiyem.

³⁰ Jesus iron, “Ait enei, ã isenneĩ di, momoi gouf nigin, aya nigin sã.

³¹ Gama Negur ï, teneub enei nẽ tamo kayau es fedif, gama teneub enei nẽ mudur iruwauf.

³² Anĩ ere, aya tenebur tamal dalesnauf sain, aya tamo ganan aya bun, didĩ afediyouf.”

³³ Jesus yogo naig fe, laa fouf anĩ ifelnẽdiyof nigin, od enei wogõ yen.

³⁴ Tamo kayau aiten dale diren, “Lo bun amã Kristus gai gai ibodõf ya anĩ karĩ maun, naig fe di, õ urok, ‘Tamo Naal ï dalesnẽf bagai?’ Ai anĩ Tamo Naal?”

³⁵ Age de di, Jesus idi irokenẽdin, “Sain naal bagai ã lalan adouf. ã lalan ado mog, uyõg, anĩ bunem gugum to irusi kerũ yeif. Tamo ï gugum bun iyok, ï naib ilef are keleĩ sã.

³⁶ ã lalan ado mog, ãgenei momoiya lalan bun unog, ago gouf, ã lalan gere tar wowã gouf.” Jesus od enei wogõ yel fen, ï itorneĩd ile, iminkelen.

Juda Tamo Kayau Jesus Nigin Fau To Momoi Den

³⁷ Jesus idi meleid bun memelik musei inodin, anĩ ere, idi fau ã nigin to momoi den.

³⁸ Enei are profet Asaia nẽ od kisi falauf nigin wõ yen:

“Odug, aim nemã od nigin momoi yen?
Aiyai bun Odug nẽ megeir yaor fen?”

³⁹ Gariya enei nigin, idi momoiya kisi feleya sã, ere nigin, Asaia baban od enei iron:

⁴⁰ “Negur idi meleid ifofa ken,
 waud ifofakelen,
anĩ bunem, idi meledim ileya kisi feleya sã,
 waud fokõya kisi feleya sã,
 waud faleiya kisi feleya sã, age fiya sam, aya
 el afedim.”§

⁴¹ Asaia od enei iron, ere nigin, ã Jesus nẽ fula fiya medeĩya ile fen, ã nigin iron.

⁴² Mudur adodo idi atun, museig ã nigin momoi den. Anĩ ere, Farisia tamo idim Juda neid uub fõ bun dirudidiya nigin kumĩ de fen, dogo neid momoiya to yaor difen.

⁴³ Ere nigin, idi Negurem yeneid yaleseye ban, tamom yeneid dalesauf anĩ orodidig.

⁴⁴ Jesus iweig iron, “Tamo ã aya nigin momoi yef, ã aya nigin dogol to momoi yef, ã aya sur fiyan nigineg momoi yef.

⁴⁵ ã aya lo fiyaf, im aya sur fiyan anĩ ilef.

⁴⁶ Aya lalan anĩ, tenebur ein asin, are taka ã aya nigin momoi yef, ã gugum bun to ibodõf nigin age afen.

⁴⁷ “Taka ï neu od karĩ ye fen, to dõ fef, aya ï to es afiyek, ere nigin, aya tamo kayau es fiya nigin to asin, aya kel gei fiya nigin asin.

⁴⁸ Taka ï aya itorna fen, neu od to irouf, ï nigin es fiya tamo ibodok. Od de wogõ aun anim, idikeleya naa bun ï es fiyẽf.

⁴⁹ Ere nigin, aya neu kisi nem to wogõ aun, anĩ ere, Dei aya sur fiyan im, ere anĩ wogõ auf, naig afe wogõ auf anĩ, toli fiya di, wogõ aun.

⁵⁰ Aya keleĩ, yogon si fiya are mata faimud ibodkeleya bun ileya nẽ, anĩ nigin, ereb aya wogõ auf, Dei aya wogõ auf nigin irokanan kilei bagai, aya wogõ auf.”

13

Jesus In Dõ Fiya Tar Yeid Kulo Fedin

¹ Pasa nẽ Sifa fau wõya sã mog, Jesus kelein, ï teneub enei itor ken, Tama garan ileya nẽ sain mogo wõ yel. ï yogon tamo tar tenebur ein dibodok anidi nigin wau laa fedig, ï idi nigin wau laa fen are iroule idikeleya bun.

² Bõ saaf dõ mog, Satanem Judas Iskariot, Simon naal namen Jesus kiwai imeid bun ifenẽf nigin, kisi mogo ifenen.

³ Tama ï ereb ereb ganan, Jesus ima bun inon, ï Negur bunem isin anĩ, Negur bun kel ilef, are Jesus ï keleĩ.

⁴ Jesus saaf bun ibodon anĩ fã ye, yogon kolos teten inukeis fen, taul yale, luwa gu fen.

⁵ Age fel fen, ï naan yale, beĩ bun yu ken, yogon dõ fiya tar yeid kulo fiya gariya inon, agef fen, taul luwa gu fen anim yeid waĩ fedin.

⁶ Jesus Simon Pita garan isi di, ã Jesus irokenen, “Odug, õ aya yeu kulo wou fenẽ de?”

⁷ Jesus Pita aiten yale irokenen, “Ereb aya age afef, õ gama keleĩ sã, anĩ ere, fau dum õ keleĩ youf.”

⁸ Pita iron, “Aya yeu to bagai kulo wouf.”

Jesus Pita irokenen, “Aya õ to kulo ayõf are, õ aya ado nigal fiya sã.”

⁹ Simon Pita Jesus irokenen, “Odug, agouf are, yeu dogol sã, imau mudurou adog kulo wouf.”

¹⁰ Jesus aiten yale iron, “Taka ã naan igukelel, ye dogol kulo fouf, bouwa ganan filiya. ã filiya ba, anĩ ere, ã ganan sã.”

¹¹ Jesus ã aibem kiwai ifenẽf anĩ keleĩ, anĩ nigin, ganan filiya sã yen.

¹² Jesus yeid kulof bure fel fen, yogon kolos ifoukel, yogon modoũ bun kelen. Agef fen, ã idi to fedin, “Aya erab ã bun age afel anĩ, ã wedereĩ fokõ yef de?”

¹³ ã aya ‘Tise’ ado ‘Odug’ gedig, are tutuk, ere nigin, aya de anĩ.

¹⁴ Aya ãgenei Tise ado Odug, ã yeĩ kulo afel, anĩ nigin, ãg abob ye kulo gouf.

¹⁵ Aya malakanon anokeneim, are ã nigin age afel gen, ãg ago gouf.

¹⁶ Aya ã momoi bagai arokeneik, ferfer takam yogon odug to wal fiyẽdig, arũ tamom ã sur fiyen to wal fiyẽdig.

¹⁷ Gama ã enei keleĩ, anĩ nigin, enei dõg ago gouf are, ã el yeĩf.

Jesus Ī Kiwai Imeid Bun Inenēf Nigin Iron
(*Matyu 26:20-25; Mak 14:17-21; Luk 22:21-23*)

¹⁸ “Aya ā ganān nigin to wogō auf. Aya agirnēdin idi, aya keleī, anī ere, enei are Negur nē Itotoya bun yenek anī kisi falauf nigin, “Taka ĩ aya urom neu bret moko, ĩ aya kiwai ifana fen, dā fiyal.”*

¹⁹ “Anī fau to wō ye mog, gama aya ā arokeneik, anī bunem, anī wō youf sain bun, aya de Im ya anī momoi gouf.

²⁰ Aya ā momoi bagai arokeneik, taka ayam sur afe di, ĩ yalef are, ĩ aya yaleyaf, taka ĩ aya yaleyaf are, ĩ aya sur fiyan anī yalef.”

Jesus Judasem Kiwai Ifenēf Yen
(*Matyu 26:20-25; Mak 14:17-21; Luk 22:21-23*)

²¹ Jesus od enei wogō yel fen, ĩ wau moro ken, kurō feis iron, “Aya ā momoi bagai arokeneik, āgenei takam aya kiwai ifanauf.”

²² Yogon dō fiya tar idi abob loli difen, ai nigin bagai wogō yef de fen, nene den.

²³ Idi neid taka, dō fiya taka Jesus ĩ nigin wau laa fedig ĩ, Jesus sirin ibodon.

²⁴ Simon Pita, dō fiya tamo enei mudurem fiye ken, ĩ iron, “Ī ai nigin irok anī to wiyē.”

²⁵ Dō fiya tamo anī, Jesus akoron mudur isen ken, to fen, “Odug, ō ai wof?”

²⁶ Jesus aiten yale iron, “Tamo bret enei beī bun nu afe fen, afenēf anī.” Age ye fen, ĩ bret nuf fen, Judas Iskariot, Simon naal ifenen

²⁷ Judas bret anī yale di, Satan ĩ namen ilen.

* **13:18:** Sam 41:9

Jesus Judas irokenen, “Ereb agou fenē, kaisā bagai ago.”

²⁸ Anī ere, saaf bun dibodon anī takam, ere nigin Jesus od enei Judas irokenen anī, kisi to fokō yen.

²⁹ Judas ī moni lo fiya tamo nigin, tunī kisi difen, Sifa nē ereb ereb na yalouf nigin be, maleg ereb ereb ifenēdiya nigin be, Jesusem Judas irokenē di, ilef den.

³⁰ Judas ī bret yale fen, kaisā bagai oreis ilen. Sain anī bō.

Pita Nē Wa Fiya Nigin Jesus Iron

(Matyu 26:31-35; Mak 14:27-31; Luk 22:31-34)

³¹ Judas iya ile di, Jesus iron, “Gama Tamo Naal fula fiya medeīya yale di, Negur fula fiya medeīya Tamo Naal bun yalef.

³² Negur fula fiya medeīya Naal bun yalef are, Negur ī fula fiya medeīya Yogo bun Naal ifenēf, fula fiya medeīya anī kaisā bagai Naal ifenēf.

³³ “Neu kesu tar, aya ã geid sain naal bagai tabodōf. ã aya umirnagauf. Aya Juda tamo arokenēdin kilei, gama ã arokeneik, aya elef nē an, ã isiya kisi feleya sã.

³⁴ “Aya ãfiya mata afeneik, abob nigin wauī laa foug. Aya ã nigin wau laa fedig kilei, ãg abob nigin wauī laa foug bagai.

³⁵ ã abob nigin wauī laa foug, anī bunem tamo ganan idi keleī youf, ã neu dō fiya tamo tar.”

³⁶ Simon Pita Jesus to fiyen, “Oduq, ò nai ulef?”

Jesus iron, “Aya elef nē an, ò gama aya dō fiyaya kisi feleya sã, anī ere, ò fau dum dō wouf.”

³⁷ Pita to fen, “Odug, ere nigin gama aya ò dō yōya kisi feleya sã? Aya ò nigin neu mata atorōf.”

³⁸ Age ye di, Jesus iron, “Ò aya nigin ogon mata utorōf de? Aya ò momoi bagai arokonok, tataro fau kokorok yeya sã mog, ò aya nigin wa wo, towo wouf!

14

Jesus In Dō Fiya Tar Neid Waud Wã Fen

¹ “Ã wauĩ to morō yeĩ. Negur nigin momoi gouf, aya nigineg momoi gouf.

² Neu Dei nē fō bun aab musei ado, age fiya sam are, arokeneim. Aya eselef nē an, āgenei modoũ dodok afouf.

³ Aya esel, āgenei modoũ dodok afel fen, aya ā geid tabodōf nigin, aya kelau gei ayeĩf, are āg aya abodok nē an ubodōgouf nigin.

⁴ Aya eselef nē naab anĩ, ā keleĩ.”

Negur Bun Ileya Naab, Jesus

⁵ Tomas Jesus irokenen, “Odug, ò narib ulef are, amã keleĩ sã, anĩ nigin, naig mafe fen, amã naab anĩ keleĩ youf?”

⁶ Jesus Tomas irokenen, “Aya dogol naab anĩ, aya dogol momoi anĩ, aya dogol mata anĩ. Taka ĩ naab taka bunem, Dei wagen to isiyouf, aya bunem dogol.

⁷ Ã aya keleim are, ā neu Deig keleim. Gama sain enei bun ilauf, ā ĩ keleĩ, ĩ ulegel.”

⁸ Filip iron, “Odug, Tamada ufelnamã, anĩ amã nigin deuf.”

⁹ Jesus iron, “Filip, aya ā geid sain meluk tabodon, anĩ ere, ò aya keleĩ sã de? Taka ĩ aya

ileyan are Dei ilen. Naig fe di, õ urok, ‘Tamada ufelnamã’?

¹⁰ Aya Dei bun abodok, Dei aya bun ibodok anĩ to momoi wof de? Od aya wogõ ayeik are, aya yug bun tamal sã, are Dei aya bun ibodok ĩ kabĩ yalef.

¹¹ Aya Dei bun abodok, Dei ĩ aya bun ibodok anĩ, momoi wiyagauf, sãf are, aya kabĩ aledig bun, momoi wiyagauf.

¹² Aya ã momoi bagai arokeneik, taka ĩ aya nigin momoi yef, ereb aya age afedig, ĩg age foug, enei age afedig anĩ wal fiyag age foug, ere nigin, aya Dei gein eselef.

¹³ ã ereb taka nigin, aya yanau nem to gouf, aya age afoug, anĩ bunem, Dei ĩ Naal bun, fula fiya medeĩya yalouf.

¹⁴ Ereb taka nigin, aya yanau nem to wiyagauf are, aya age afoug.

Jesus Awa Uur Fateul Sur Afoug Yen

¹⁵ “ã aya nigin wauĩ laa foug are, neu ĩtãfiya anĩ dõ gouf.

¹⁶ Aya Dei arokenẽ di, ĩ Isenneĩya taka, ã geid gai gai ibodõf nigin ifeneĩf,

¹⁷ are momoi nẽ Awa Uur. Tenebur ein tamo kayau ĩ to dalouf, ere nigin, idi ĩ to dilef, to keleĩ. Anĩ ere, ã ĩ keleĩ, ere nigin, ĩ ã geid ibodok, ã bun ibodõf.

¹⁸ Aya ã madmad gen to atorneĩf. Aya ã gein asiyouf.

¹⁹ Sain naal bagai ile di, tenebur ein tamo kayau, aya to dileyauf, anĩ ere, ã uleyagauf. Aya mata abodok nigin, ãg mata ubodõgoug.

20 Naa anĩ bun, aya neu Dei bun abodok, ã aya bun ubodõgef, aya ã bun abodok anĩ, ã keleĩ youf.

21 Taka ĩ neu ĩtãfiya irou dõ fef, ĩ aya nigin wau laa fedig. ĩ aya nigin wau laa fedig anĩ, neu Dei ĩ nigin wau laa foug, ayag ĩ nigin wau laaf fen, aya yug ĩ bun yaor afoug.”

22 Age ye di, Judas taka (Judas Iskariot anĩ sã) iron, “Odug, ere nigin õ ogo, amã bun dogol õ yaorõf, tenebur ein tamo kayau bun sã?”

23 Jesus iron, “Taka ĩ aya nigin wau laa fef, ĩ neu od dõ foug. Neu Dei ĩ nigin wau laa foug, anĩ amã ĩ gein masi, weim mabodõf.

24 Taka ĩ aya nigin to wau laa fef, ĩ neu od to dõ foug. Od enei ã karĩ gef, are aya bun tamal sã, are Dei aya sur fiyan nẽ od.

25 “Aya fau ã geid tabod ken, od enei ganan wogõ ayein.

26 Anĩ ere, Isenneĩya, Awa Uur Fateul anĩ, Deim aya yanau nem sur foug, Awa Uur Fateul ĩ, ereb ereb ganan ifelnei ken, aya arokenein anĩ ganan wedereĩ fokõf fen, kisi turĩ foug.

27 Wau inosiya atorkeneik, neu wau inosiya afeneik, aya afeneik are, tenebur ein tamo kayau wau inosiya difeneik gen sã. ã wauĩ to morõ yei ken, kumĩg.

28 “Aya eig au di, karĩ gel, ‘Aya ele fen, ã gein kelau asiyoug.’ ã aya nigin wauĩ laa fem are, aya Dei bun elef anĩ nigin, ã kulĩya adom, ere nigin, Dei ĩ aya wal fiyaya.

29 Anĩ wõya sã mog, aya mogo arokeneim, anĩ bunem, agef wõ ye di, ã momoi goug.

³⁰ Aya ã geid, sain meluk to wogõ tauf, ere nigin, teneub enei nẽ mudur mogo isif. Anĩ ere, ã aya lai fiyaya nigin megeir sã,

³¹ anĩ ere, tenebur ein tamo kayau keleĩ bagai youf, are aya Dei nigin wau laa fef, anĩ nigin, neu Dei irokanan kilei bagai age afedig.

“Fafãg fen, modoũ enei tatorõg.

15

Aa Wain Gariya Ado Yogon Were

¹ “Aya aa wain bagai, neu Dei ã kabĩ marau.

² Were aya bun biya to yuk anĩ ganan, Deim kokour falauf, were biya yuk anĩ ganan, Deim dẽ fe di, biya musei imauf.

³ Aya od wogõ ayein anim, ã amuyẽ sã, ã mogo filiya.

⁴ ã aya bun ubodõgouf, ayag ã bun abodõf. Were taka aa wain luwa ado to susu falauf are, yogo biya yũya kisi feleya sã. Age fiya bagai, ãg aya bun to ubodõgouf are, biya yũya kisi feleya sã.

⁵ “Aya aa wain gariya, ã were. Taka ã aya bun ibodõ di, ayag ã bun abodõf are, ã biya musei imauf. Aya utornagauf are, ã ereb taka to ago gouf.

⁶ Taka ã aya bun to ibodõf are, ã were diraille di, meti ledig gen. Were age fediya are gei de fen, yã dirarã di, isasaikediyouf.

⁷ ã aya bun ubodõge di, neu od ã bun ibodõf are, ereb taka oroyei ken, urokanage di, ifeneĩf.

⁸ Biya musei ùg fen, neu dõ fiya tar wowã gouf are, neu Dei ã fula fiya medeĩya yalouf.

⁹ “Neu Dei aya nigin wau laa fedig kilei, ayag ã nigin wau laa fedig. Gama ã neu wau laa fiya anĩ bun ubodõg.

¹⁰ Aya neu Dei nẽ ãfiya dõ afe fen, yogon wau laa fiya bun abodok kilei, ã neu ãfiya dõ gouf are, neu wau laa fiya bun ubodõgouf.

¹¹ Aya enei arokeneim, are neu kulĩya ã namein ibod ken, ãgenei kulĩya barikãf nigin.

¹² Neu ãfiya are yeir, aya ã nigin wau laa fedig gen, ãg abob nigin wauĩ laa fouf.

¹³ Wau laa fiya enei wau laa fiya ganan wal fiya, are yogon mou tar nigin yogon mata itorok anĩ.

¹⁴ ãfiya are ãfiya arokenein anĩ dõg, ago gouf are, ã neu mou tar.

¹⁵ Aya baban ã to ferfer ayeĩf, ere nigin, ferfer ã yogon tamo odug nẽ kabĩ keleĩ sã. Anĩ ere, aya ã neu mou tar ayeim, ere nigin, ereb ereb ganan aya Dei bun karĩ aun anĩ, aya ã afelneim.

¹⁶ ãgem aya to ugirnagen, aya ã agirnei ken, uleg, biya ãg fen, biya anĩ ibodkalauf nigin ã ayein. Agog fen, aya yanau nem, ereb taka nigin Dei urokenẽge di, ifeneĩf.

¹⁷ Enei anĩ neu ãfiya, abob nigin wauĩ laa fouf.

Tenebur Tamo Kayau, Dõ Fiya Tamo Tar Nigin Kiwai Difenẽdiyof

¹⁸ “Tenebur tamo kiwai difeneĩf are, aya ketem kiwai difanan anĩ, ã keleĩ youf.

¹⁹ ã teneub enei nẽf are, ã yogon nigin, ã nigin wau laa fouf. Anĩ ere, ã teneub enei nẽ sã, aya ã tenebur tamal gei ayei ken, agirnein. Anĩ nigin, tenebur ein ã kiwai difeneik.

²⁰ Aya od arokenein anī, ã karī walagauf, ‘Ferfer taka yogon odug to wal fedig.’* Idi aya darau difanan are, ãg age de darau difeneif. Idi neu od dō difen are, idi ãgeneig age de dō difouf.

²¹ Idi enei ganan ã bun age difouf, ere nigin, aya yanau ã ado, are aya sur fiyan idi ī keleī sā nigin.

²² Aya to asi fen, arokenēdim are, idi mosor sam. Anī ere, idi neid mosor nigin to galã dūf.

²³ Taka ī aya kiwai ifanaf, ī neu Deig kiwai ifenek.

²⁴ Taka nem to age fen anī, aya idi atun to age afem are, idi mosor sam. Anī ere, gama idi memelik dile fen, aya neu Dei ado kiwai difanaman.

²⁵ Anī ere, enei, idi neid Lo bun ditoton yenek anī, kisi falauf nigin, ‘Idi aya mura sā kiwai difanan.’†

²⁶ “Awa Uur Isenneiya are, ayam Dei bun tamal ã bun sur afe di, isiyouf, are momoi nē Awa Uur, Dei bun tamal ulō yeis isi fen, ī aya nigin kurō fesiyouf.

²⁷ ãg agog kurō wesigouf bagai, ere nigin, ã aya geid fen, gariya bunem tasin.

16

¹ “Ã to felu rogouf nigin, od enei ganan mogo ã wogō ayeim.

² Idi ã Juda neid uub fō bun diruyeif. Takag, sain fau isiyouf bun, taka ī ã ideneikeis fen, kisi fouf, Negur sesewi afiyek youf.

* 15:20: Jon 13:16 † 15:25: Sam 35:19; 69:4

³ Idi enei age difouf, ere nigin, idi Dei keleĩ sã, aya nigineg keleĩ sã.

⁴ Aya enei mogo arokeneim, are sain isiyouf bun, ã wedereĩ aroul anĩ, karĩ walagauf nigin. Aya enei tetun to arokenein, ere nigin, aya ã geiden.

Awa Uur Fateul Nē Kabĩ

⁵ “Gama aya ĩ sur fiyan gein eselef, anĩ ere, ã takam to aya to fiyaf, ‘Ō nai ulef?’

⁶ Aya enei arokeneim nigin, ã fatuk bagai wauĩ gudũ fef.

⁷ Anĩ ere, aya momoi arokeneik, aya ãgenei biya fiya nigin eselef. Aya to eselauf are, Isenneĩya anĩ ã bun to isiyouf, aya eselauf are, aya ĩ, ã bun sur afouf.

⁸ Sain ĩ isiyouf, tenebur ein tamo kayau bun, mosor nigin, Negur nē madur fiya nigin ado, Negur nē es fiya nigin, idi neid kũ feněya anĩ yaor fe, faded fediyouf.

⁹ Mosor are, idi aya nigin to momoi def nigin.

¹⁰ Negur nē madur fiya are, aya Dei gein esele di, ã aya to uleyagauf nigin.

¹¹ Negur nē es fiya are, teneub enei nē mudur mogo es fiyen nigin.

¹² “Aya ã irokeneĩya nigin musei biya, anĩ ere, ã gama keleĩya kisi feleya sã.

¹³ Anĩ ere, sain momoi nē Awa Uur isiyouf bun, momoi nē anĩ ganau bun, im itoneĩf. ĩ yogon kisim to wogõ youf, ereb ĩ karĩ yef anĩ wogõ youf, agef fen, ereb fau wõ youf anĩ irokeneĩf.

¹⁴ ĩ neu bun tamal yale fen, ã ifelneĩf, anĩ bunem, aya fula fiya medeĩya ifanauf.

15 Dei nē ganan are neu, anī nigin, aya arom, Awa Uur neu bun tamal yale fen, ā ifelneĩf aul.

16 “Sain naal bagai ile di, ā to uleyagauf, agef fen, baban sain naal bagai ile di, aya uleyagauf.”

In Dō Fiya Tar Waud Gudū Fef Are Fau Kulī Douf

17 In dō fiya tar tunī abob dirokenen, “Ere gariya nigin eig ye irok, ‘Sain naal bagai ile di, ā to uleyagauf, agef fen, baban sain naal bagai ile di, aya uleyagauf,’ takag, ‘Ere nigin, aya Dei gein eselef nigin,’ yef?”

18 Idi anī fau fau wogō den, “Ĩ ere ye fen, ‘sain naal bagai’ yen? Ĩ irok anī, amā gariya keleĩ sā.”

19 Idi enei nigin Jesus to difou fenē mog, Jesus anī ile fen, idi irokenēdin, “Aya eig aul anī nē gariya nigin abob to wiyēgef de, ‘Sain naal bagai ile di, ā to uleyagauf, agef fen, baban sain naal bagai ile di, aya uleyagauf’?”

20 Aya ā momoi bagai arokeneik, ā fau maruĩ isi fen, wauĩ gudū fouf, tenebur tamo kayau kulī de mog. Ā wauĩ gudū fouf, anī ere, āgenei wauĩ gudū fiya falei yel kulī youf.

21 Kayau kesu ibodō fenē darau fef, ere nigin, yogon naa wō yel, anī ere, yogon kesu wō ye di, darau weder tu kelef, ere nigin, kesu tenebur wō yel nigin kulī yef.

22 Āg age fiya, gama āgenei wauĩ gudū fiya nē naa, anī ere, aya baban ailiyeĩ di, ā kulī gouf, taka nem āgenei kulīya to yalelkeneĩf.

23 Naa anī bun, ereb taka nigin ā to, to wiyagauf. Aya ā momoi bagai arokeneik, aya yanau bunem, ereb taka nigin neu Dei to wiyēgouf are, ifeneĩf.

²⁴ Uruwa bunem isi gama, aya yanau nem, ereb taka nigin to, to gen. To gouf, walogouf, ago gouf, ã kulīya barikāf.

²⁵ “Aya yaab od wogō audig, anī naa taka isiyouf bun, aya yaab od to wogō auf, anī ere, neu Dei nigin yaor arokeneif.

²⁶ Naa anī bun, aya yanau bunem to gouf. Aya ã nigin Dei to afiyēf ya anī to arokeneik,

²⁷ ere nigin, ã aya nigin wauī laaf fen, aya Negur bun tamal asin anī, momoi gedig nigin, Dei ã nigin wau laa fedig.

²⁸ Aya Dei bun tamal ulō aus fen, tenebur asin, gama aya teneub enei ator ken, Dei bun kelauf.”

²⁹ Age ye di, Jesus nē dō fiya tar diron, “Gama ò yaor wogō wof, yaab od nem sā.

³⁰ Gama amā mailef, ò ereb ereb ganan keleī, are taka nem to yōf anīg to tari wodig. Anī bunem, ò Negur bun tamal usin anī, momoi mauf.”

³¹ Jesus aitedin yale iron, “Ã gama momoi gef de?

³² Anī ere, naa fau isif, are mogo isil, anī bun, ã firagagaū yeī, āgenei fonō fonō yeif. Ã aya mugu utornagauf. Anī ere, aya mugu sā, ere nigin, neu Dei ī aya ado.

³³ “Ã aya bun wauī inosiya adouf nigin, od enei arokeneim. Tenebur ein ã morō adouf, anī ere, total ado ufaragauf! Aya teneub enei nē megeir mogo wal afen.”

17

Jesus Yogo Nigin Kosē Yen

¹ Jesus od enei wogō yel fen, saa ilun itad fen, kosē yen:

“Dei, naa mogo isil, fula fiya medeīya ō Naal wenē, ago di, ō Naal ō selī kulō foug.

² Are ō Naal, idi ganan ō wenen bun, mata faimud ibodkeleya ifenēdiyof nigin, tamo kayau ganan lo fediya nē megeir ō wenen.

³ Mata faimud ibodkeleya are yeir, ō momoi Negur tekelei ado Jesus Kristus ō sur won anī, idi keleī youf anī.

⁴ Kabī ō wanan anī adikelen bunem, tenebur ein aya ō bun fula fiya medeīya arou asin.

⁵ Dei, teneub kare fiya sā mog, ada urom fula fiya medeīya adon anī, ō malā bun fula fiya medeīya anī gama wana.

Jesus In Dō Fiya Tar Nigin Kosē Yen

⁶ “Aya teneub enei bun tamal ō wanan idi bun, ō yaor ayon. Idi ogon, anī ere, ō idi wanan, ago di, idi ogon od dō difedig.

⁷ Gama idi keleī, ereb ereb ganan aya wanan are ō bun tamal.

⁸ Aya od wanan anī afenēdi di, idi dalen. Aya ō bun tamal asin anī, idi momoi bagai kelein, idi onom aya sur wiyan anī momoi den.

⁹ Aya idi nigin kosē auf. Aya teneub enei nē tamo kayau nigin to kosē auf, anī ere, idi ō wanan anidi nigin kosē auf, ere nigin, idi ogon.

¹⁰ Neu ganan are ogon, ogon are neu. Idi bunem, aya fula fiya medeīya alel.

¹¹ Aya tenebur ein to abodōf, anī ere, idi fau tenebur dibodok, aya ō gein esef. Dei Fateul, ō

yanã wanan nẽ megeir bunem, kulatun wediyouf, anĩ bunem, ada tekelei gen idig tekelei youf.

¹² Sain aya idi geid mabodon, õ aya yanã wanan anĩ bunem, kulatun afeid el afen. Taka to fõ yelen, tamo ĩ fõ yalauf nẽ dogol fõ yelen, are Negur nẽ Itotoya kisi falauf nigin.

¹³ “Gama aya õ gein esef, neu kulĩya idi namedin barikãf nigin, tenebur ein fau abod ken, od enei arok.

¹⁴ Aya ogon od afenēdi di, teneub enei nẽ tamo kayau idi kiwai difenēdin, ere nigin, gama aya teneub enei nẽ sã, age fiya gen, idig teneub enei nẽ sã.

¹⁵ Aya teneub enei bun tamal walelnēdiyof nigin to kosē auf, anĩ ere, wadāgen tamo sane isi fen, daũ fediya nigin, kulatun wediyof anĩ kosē auf.

¹⁶ Aya teneub enei nẽ sã, age fiya gen, idig teneub enei nẽ sã.

¹⁷ Momoi bunem fateul unenēdiyof, ogon od are momoi.

¹⁸ Õ tenebur ein sur wiyān gen, ayag teneub enei bun sur afiyēdin.

¹⁹ Idi nigin, aya yug adok bagai afonok, are idig momoi bagai dogo adok Negur difenēf nigin.

Jesus Momoiya Tamo Kayau Ganan Nigin Kosē Yen

²⁰ “Aya neu kosēya are idi nigin dogol sã, idi neid od bunem, aya nigin momoi douf anidi nigineg, aya kosē auf,

²¹ idi ganān tekelei youf nigin kosē auf, Dei õ aya bun ubodok, aya õ bun abodok gen, idig ada

bun dibodō di, teneub enei nē tamo kayau, onom aya sur wiyan anī, momoi douf nigin.

²² Fula fiya medeīya ō wanan anī, idi afenēdin, are ada tekelei gen, idig tekelei youf nigin.

²³ Aya idi bun, ō aya bun, are idi tekelei youf nigin, anī bunem, onom aya sur wiya fen, aya nigin waū laa fedig gen, idi nigineg waū laa fedig anī, teneub enei nē tamo kayau keleī youf.

²⁴ “Dei, idi ō aya wanan anidi, aya abodok nē an, aya geid mabodōf anī orouf, are idi neu fula fiya medeīya dilouf nigin, fula fiya medeīya anī teneub kare fiya sã mog, ō aya nigin waū laaf fen, wanan anī.

²⁵ “Dei madur bagai, teneub enei nē tamo kayau idi ō keleī sã, anī ere, aya ō keleī, neu dō fiya tar idi, onom aya sur wiyan anī keleī.

²⁶ Aya ō anī afelnēdi di, idi ō keleī, ō nigin fau fau afelnēdif alauf, are ō aya nigin waū laa fiya anī, idi bun ibodōf ado, ayag idi bun abodōf nigin.”

18

Jesus Dirounen

(Matyu 26:47-56; Mak 14:43-50; Luk 22:47-53)

¹ Jesus od enei wogō yel fen, ī yogon dō fiya tar geid, Kidron naan uus atu dilen. Kidron sitakā kabī taka ibodon, ī yogon dō fiya tar geid, kabī atu dilen.

² Kiwai tamo Judas ī modoū anī keleī, ere nigin, sain musei Jesus in dō fiya tar geid an guru difedig.

³ Anĩ nigin, Judas, kusĩ tamo tunĩ ado, tempel lo fiya tamo tunĩ pris mudur adodo Farisia tamo geid idim sur difedin anidi geif fen, kabier uyu ile di, dilen. Idi yal, lam, kusĩ nē waila guri de fen, dilen.

⁴ Jesus, ĩ bun wō youf anĩ ganan kelein, ĩ iyok ile to fedin, “Ã ai umirnēgef?”

⁵ Idi diron, “Jesus Nasaret tamal.”

Jesus iron, “Aya im.” Kiwai tamo Judas, idi geid an difaren.

⁶ Sain Jesus iron, “Aya im,” ye di, idi soso de dile, tenebur kuku den.

⁷ Jesus baban idi to fedin, “Ã ai umirnēgef?”

Idi diron, “Jesus Nasaret tamal.”

⁸ Jesus iron, “Aya ã arokeneim, aya im. Aya anĩ umirnagauf are, tamo eneidi utornēdig len, dile.”

⁹ Agef iron are, od Jesus wogō yen anĩ kisi falauf nigin, “Aya õ wanan anidi taka to folō afelen.”*

¹⁰ Age dife di, Simon Pita ĩ, dimig adon anĩ ul feis yale, pris neid mudur nē ferfer weder biya melem salōf iran. Ferfer anĩ yana Malkus.

¹¹ Age fe di, Jesus Pita irokenen, “Ogon dimig yogon modoũ bun kel uno! Dei aya naan kap ifanan anĩ, aya to ãf de?”

Jesus Anas Garan Dirou Dilen

¹² Age ye di, kusĩ tamo, nedi mudur, Juda neid tempel lo fiya tamo geid, Jesus dalen. Idi ĩ difo ken,

¹³ Anas garan ket dirou dilen, Anas ĩ, Kaiafas ne ten, yar anĩ bun Kaiafas ĩ pris neid mudur ibodon.

* **18:9:** Jon 6:39

14 Kaiafas im, Juda tamo kayau wedereid irou fen, tamo tekeleim tamo kayau ganan nigin laa fouf, are deuf, yen.

Pita Jesus Nigin Wa Fen

(Matyu 26:69, 70; Mak 14:66-68; Luk 22:55-57)

15 Simon Pita, Jesus nē dō fiya tar taka ado, Jesus dō difen. Pris neid mudur, dō fiya tar taka anī keleī, anī nigin, ī Jesus ado, pris neid mudur nē fofomalan kau namen dilen.

16 Anī ere, Pita ī serē bobogen ifaren. In dō fiya taka ī pris neid mudur ī nigin keleī, ī baban serē ke len, bobog lo fiya kayau iroken ken, Pita yale irou, namen dilen.

17 Kabī kayau bobog lo fedig ī, Pita to fiyen, “Ōg be, in dō fiya tamo taka anī sã de?”

Pita iron, “Aya sã.”

18 Menig nigin, ferfer, tempel lo fiya tamo geid, yã kũ de fen, salili de, bouweid diroron. Pita ĩg weim difar fen, bouwa ironon.

Pris Neid Mudur Jesus To Fiyen

(Matyu 26:59-66; Mak 14:55-64; Luk 22:66-71)

19 Fō namen, pris neid mudur, Jesus ī, in dō fiya tar nigin ado, yogon od tai fedin nigin to fiyen.

20 Jesus solof iron, “Aya tamo kayau atun, mala yaor wogō aun. Aya sain faimud Juda neid uub fō bun be, tempel bun, Juda tamo kayau ganan guru de mog, wogō audig. Aya iminēyan taka to wogō aun.

21 Ere nigin anī aya to wiyaf? Idi aya wogō au di, karī difiyan onou idi to wiyeīd. Ereb aya wogō aun, idi keleī.”

²² Jesus age ye irō di, tempel lo fiya tamo taka non ifaren anim, Jesus wala fāf fen, iron, “Pris neid mudur anī, ò ago urokenēdig de?”

²³ Jesus solof irokenen, “Aya ereb kũ fenēya arom are, ò ereb kũ fenēya anī urōf. Anī ere, aya momoi arom are, ere nigin ò walau fā wol?”

²⁴ Age ye di, Anas Jesus difon ado, pris neid mudur Kaiafas gein sur fen.

Pita Jesus Nigin Baban Wa Fen

(Matyu 26:71-75; Mak 14:69-72; Luk 22:58-62)

²⁵ Simon Pita bouwa irorouk ifar mog, idi ī to difiyen, “Ōg be, in dō fiya tamo taka anī sã de?”

Ī waf fen, iron, “Aya sã.”

²⁶ Pris mudur nē ferfer taka, ī Pitam weder salōf iran nē sirag anim iron, “Aya ò ī urom kabier to ailiyeim de?”

²⁷ Pita baban waf mog, kaisã bagai tataro kokorok yen.

Jesus Pailat Mala Bun Ifaren

(Matyu 27:1, 2, 11-31; Mak 15:1-20; Luk 23:1-25)

²⁸ Age fe di, Juda tamo, Jesus Kaiafas bun tamal dale dirou, Rom gawaman mudur nē fō bun dilen. Are bonimeī bagai, Juda tamo idi Pasa nē saaf dāf nigin, kal sese de fen, gawaman mudur nē fō namen to dilen.

²⁹ Anī nigin, Pailat idi gedin ulō yeis isi fen, to fedin, “Ere od ã tamo enei bou bun unougouf?”

³⁰ Idi solo de diron, “Ī lo wal fiya tamo sam are, amã ò gein to marou masim.”

31 Pailat idi irokenēdin, “Ā aug ĩ waleg fen, āgenei lo bun es wiyēg.”

Juda tamo idi Pailat dirokenen, “Amam tamo yukesiya nigin Rom gawaman to yo faman.”

32 Are Jesus ĩ naig be fe, laa foug nigin wogō yen anī, kisi falauf nigin agef wō yen.

33 Age de di, Pailat aaben kel ile, Jesus iweigne ken, to fiyen, “Ō Juda neid king de?”

34 Jesus solof iron, “Ō ogon kisim od enei urok de, tunim be aya nigin ō dirokono?”

35 Pailat solof iron, “Aya Juda tamo de? Ō ogon tamo kayaum pris odudug geid, aya bun dirousiyom. Ō ere taka tau agon?”

36 Jesus iron, “Aya neu tano teneub enei nē sã. Aya neu tano teneub enei nem are, neu kabī tamo, Juda tamom aya to daleyauf nigin kusī dem. Anī ere, neu tano teneub enei nē sã.”

37 Age ye di, Pailat Jesus irokenen, “Age foug, ō king de?”

Jesus solof iron, “Ō ogo yer urok, aya king. Enei nigin aya wō aun, are momoi anī wogō auf nigin, anī nigin, aya tenebur asin. Momoi nē ganan, aya karī difiyadig.”

38 Pailat to fen, “Ere anī momoi?” Age yel fen, ĩ baban Juda tamo gedin serē ile, idi irokenēdin, “Aya ĩ bun mosor taka to ailef.”

39 Anī ere, āgenei tobonuneī eig fiya, Pasa naa bun, kalabus tamo taka aliskeneīdig. Ā Juda neid king aliskeneīf anī oroyeik de?”

40 Idi baban diweig, solo de diron, “Sã, ĩ sã! Barabas anī wanamãf!” Barabas ĩ anī bē tamal.

19

Pailat Jesus Aa Tetek Bun Dũf Nigin Iron

¹ Age de di, Pailat Jesus yale fen, irõ di, wagĩ difiyen.

² Kusĩ tamo malũ duri ado dale, teter tanak kori de fen, ĩ mudur bun kurũ difiyen. Idi gabar kadaũ dale difounne ken,

³ idi baba baban ĩ wagen dile fen, diron, “O Juda neid king gai gai ibodõf!” Age de fen, wala fã difen.

⁴ Pailat baban serẽ kel isi fen, Juda tamo irokenẽdin, “Ulegef, aya ĩ bun mosor taka to ailef anĩ, ã keleĩ youf nigin, ĩ ã gein arou asif.”

⁵ Sain Jesus malũ duri kurũ difiyen, gabar kadaũ difounnen ado, serẽ isi di, Pailat idi irokenẽdin, “Tamo are yeir!”

⁶ Pris odudug, tempel lo fiya tamo geid, ĩ dile fen, diweig diron, “Aa tetek bun ũf! Aa tetek bun ũf!”

Anĩ ere, Pailat idi irokenẽdin, “Ã aug waleg, aa tetek bun ũg. Aya ĩ bun mosor taka to ailef.”

⁷ Juda tamo idi solo de diron, “Amã nemã lo ado, lo anĩ kilei ĩ laa foun, ere nigin, ĩ yogo aya Negur Naal yedig.”

⁸ Od enei Pailat karĩ ye fen, fatuk bagai kumĩ yen.

⁹ ĩ baban fõ aaben kel ile fen, Jesus to fiyen, “Õ nain tamal?” Anĩ ere, Jesus aiten to yalen.

¹⁰ Pailat Jesus irokenen, “Õ aya od to urokanauf de? Aya õ kafĩ fiya bun tamal yalelnõya nigin megeir ado, õ aa tetek bun inõya nigin megeir ado anĩ, õ keleĩ sã de?”

11 Jesus solof iron, “Ilun tamal megeir ò to ifonom are, aya ogon megeir farumen to abodom. Anĩ nigin, tamo taka ĩ aya ò imã bun inenan, ĩ yogon mosor odug bagai, ogon wal fiya.”

12 Jesus Pailat age fiyẽ di, Pailat Jesus kafĩ fiya bun tamal yalishnẽf nigin, naab imiren, anĩ ere, Juda tamo idi diweig diron, “Õ tamo enei utornẽ di, ilauf are, ò Sisa* nẽ mou sã. Taka ĩ yogo anĩ king yef, ĩ Sisa kiwai ifenek.”

13 Pailat od enei karĩ ye fen, Jesus serẽ yale irou isi fen, es fiya tamo nẽ sia, Meein Bedu dedig modoũ bun ibodon (Meein Bedu are, Hibru od nem yana Gabata).

14 Naa are Pasa Sifa nigin dodok fiya naa, gaa atun age fiya, naa anĩ ilele di, Pasa naa wõ youf.

Pailat Juda tamo idi irokenẽdin, “Ãgenei king yeir.”

15 Anĩ ere, idi diweig diron, “Uru uraile! Uru uraile! Aa tetek bun ũ!”

Pailat to fen, “Aya ãgenei king aa tetek bun aũf de?”

Pris odudug solo de diron, “Amã king taka sã, Sisa dogol.”

16 Anĩ nigin, Pailat Jesus aa tetek bun dũf nigin, idi imeid bun inon.

Jesus Aa Tetek Bun Dun

(Matyu 27:32-44; Mak 15:21-32; Luk 23:26-43)

Anĩ nigin, kusĩ tamo Jesus dalen.

17 ĩ yogon aa tetek faali fe, modoũ Mudur Tuwan (Hibru od nem Golgota dedig) iselen.

* **19:12:** Rom neid king odug.

¹⁸ An idi Jesus aa tetek bun dun, tamo uru idig, ã geid aa tetek bun didenen, idi urom si sitakã, Jesus atun.

¹⁹ Pailat irõ di, eig de ditot fen, aa tetek bun degẽ difen: JESUS NASARET TAMAL, JUDA NEID KING.

²⁰ Juda tamo kayau musei itotoya enei diwesen, ere nigin, Jesus aa tetek bun dun modoũ are taun non. Itotoya are Hibru od nem, Rom od nem, Grik od nem.

²¹ Juda neid pris odudug Pailat dirokenen, “To ‘Juda neid King’ wo utot, anĩ ere, tamo enei yogo aya Juda neid king yen, ago utot.”

²² Pailat aitedin yale iron, “Ereb aya atoton, are de agef ibodõf.”

²³ Sain kusĩ tamo Jesus aa tetek bun du ken, Jesus nẽ kolos gei difeid, aiwa adodo foi difen, are teke tekelei kusĩ tamo mugu mugum gei difen, kolos meluk ilon tamal dogol foi fiya sã. Kolos are meluk tekelei tokõ feleya diwan.

²⁴ Idi abob dirokenen, “Ada anĩ to serek tafouf, ada aisaĩ tara ken, aibem yalouf anĩ tailauf.”

Negur nẽ Itotoya eig ye irok anĩ kisi falauf nigin, agef wõ yen,

“Neu kolos idi atun foi difeid fen,
neu kolos meluk nigin aisaĩ diran.”†
Anĩ nigin, kusĩ tamo idi enei age difen.

²⁵ Jesus nẽ aa tetek sirin, Jesus sina, sina nẽ tura, Maria Kolopas aiwa, Maria Magdala tamal an difaren.

²⁶ Sain Jesus mala irã, sina ado in dõ fiya tamo taka ã nigin wau laa fedig non difar mog, ileid fen, Jesus ã sina irokenen, “Kayau, õ naal yeir.”

† 19:24: Sam 22:18

²⁷ Age ye fen, Jesus yogon dō fiya tamo iroke-nen, “Enei ogon sinã.” Naa anĩ bunem ilen, dō fiya tamo enei sinawau yale, yogon fō bun iroule, kulatun fiyen.

Jesus Laa Fen

(Matyu 27:45-56; Mak 15:33-41; Luk 23:44-49)

²⁸ Anĩ dumen, Jesus keleĩ, ereb ereb ganan mogo gama bure felel, Negur nē Itotoya bun ibodok anĩ kisi falauf nigin, Jesus iron, “Aya naan ail fiyaf.”

²⁹ Wain makik yag ado an ibodon, idi spons dale, wain bun nu dife, aa hisop were bun dino fen, dales, Jesus sigoron dinon.

³⁰ Jesus wain makik anĩ yale fen, iron, “Gama bure.” Age yel fen, guyu kureis, yogon uur itoron.

³¹ Gama naa are dodok fiya nē, we fele di, are Sabat naa, Sabat anĩ are, uub odug. Juda tamo idi, Sabat naa bun, bouweid aa tetek bun ifareya ditorōdig, anĩ nigin, idi yeid weweur difeid, bouweid gei difalaisiyouf nigin, Pailat dirokenen.

³² Anĩ nigin, kusĩ tamo disin, tamo taka ket ye weweur difen, takag age difen, idi Jesus geid, aa tetek bun didenen anidi.

³³ Anĩ ere, idi Jesus wagen disin fen, ĩ mogo laa fen anĩ dilen, anĩ nigin, idi ĩ ye to weweur difen.

³⁴ Anĩ fotokar, kusĩ tamo takam, ot nem Jesus siri gilĩ fe di, naud naan ado fi felen.

³⁵ Tamo enei ilen im wogō yen, yogon wogōya are momoi, ĩ keleĩ, ĩ momoi wogō yef, are āg momoi gouf nigin wogō yef.

³⁶ Negur nē Itotoya enei kisi falauf nigin agef wō yen, “Yogon tuwa taka to were fouf,”[‡]

³⁷ agef fen, Negur nē Itotoya takag irok, “Idi siri gilī difen tamo ĩ, idim dilouf.”[§]

Jesus Mũ Difen

(Matyu 27:57-61; Mak 15:42-47; Luk 23:50-56)

³⁸ Anī dum, Josef Arimatea tamal, Jesus bouwa buru yalouf nigin Pailat irokenen. Josef ĩ, Jesus nē dō fiya tamo taka, anī ere, ĩ Juda tamo nigin kumī ye fen, iminēyan Jesus dō fen. Pailat yo ye di, ĩ isi, Jesus bouwa yalen.

³⁹ Josef ĩ Nikodemus ado fen, disin, kulu tamo anim, bō Jesus gein ilen. Nikodemus ĩ, marasin yana mer (myrrh) aloi (aloe) ado falei difen anī iroulen, anī nē morō teti kilogram age fiya.

⁴⁰ Idi urom Jesus bouwa dale, marasin ado gabar lalau nem filu difen. Juda neid tamo mũ fiya tobonunā bunem age difen.

⁴¹ Jesus aa tetek bun dun nē modoũ an, kabī taka ado, kabier an, ku mata taka ado, taka an to goro difen.

⁴² Naa are Juda neid dodok fiya nē naa nigin ado, tokō kug melsā nigin, idi Jesus an goro difen.

20

Matmat Gorō Ibodon

(Matyu 28:1-8; Mak 16:1-8; Luk 24:1-12)

¹ Uub nē naa matu Sande bun, bonimei bagai gugum ado, Maria Magdala tamal matmat bun ile fen, mala irā, bobog bun meein yaleleya ilen.

[‡] 19:36: Eksodas 12:46; Namba 9:12; Sam 34:20
Sekaraia 12:10

[§] 19:37:

² Anĩ kayau, Simon Pita, dõ fiya taka Jesus ï nigin wau laa fedig anidi gedin gudu ref ile, irokenēdin, “Idi Odug matmat bun tamal dale diroulen, ï nain be dinon, ada keleĩ sã!”

³ Anĩ nigin, Pita, dõ fiya tamo taka ado, matmat bun dilen.

⁴ Urom gududu den, anĩ ere, dõ fiya tamo takam Pita wal fe, ï ket matmat bun wõ yen.

⁵ ï iti ken, fai yen, gabar lalau filu difen anĩ an yen mog, ilen, anĩ ere, ï kuren to ilen.

⁶ Age fe di, Simon Pita dum dõ fiyen, wõ ye fen, tokõ fel, matmat kuren ile, gabar lalau filu difen an yen mog, ilen,

⁷ mũ difen gabar Jesus mudur sile difen anĩg ilen. Mudur sile difen gabar are, yogo fire kori fel, gabar lalau filu difen anĩ firen ibodon.

⁸ Age fe di, dõ fiya tamo taka, ï ket matmat bun wõ yen ïg, kuren ilen. ï ile fen, momoi yen.

⁹ (Jesus laa bun tamal kel fã youf ya, Negur nē Itotoya bun yenek anĩ, idi fau wedereid fokōya sã.)

*Jesus Maria Magdala Tamal Bun Wõ Yen
(Matyu 28:9, 10; Mak 16:9-11)*

¹⁰ Age de fen, dõ fiya tar, nedi fõ bun ke de dilen.

¹¹ Anĩ ere, Maria matmat serē inã yalef ifaren. ï inã ado inã ado iti ken, matmat namen fai yen.

¹² Agef fen, ï, engel uru kolos lalau adodo, Jesus yenen modoũ bun dibod mog, iledin, taka muduren, taka yen.

¹³ Idi ï to difiyen, “Kayau, õ ere nigin inã walef?”

Maria iron, “Idi neu Odug dale diroulen, ï nain be dinon anï, aya keleï sã.”

¹⁴ Age ye fen, ï falei yel, Jesus an ifar mog ilen, anï ere, are Jesusem ya anï to kelein.

¹⁵ Jesus iron, “Kayau, õ ere nigin inã walef? Õ ai anï umirnek?”

Maria kisi fen, ï kabï lo fedig anim ye fen, irokenen, “Tamo biya, onom ï wale uroulen ouf are, nain be unon anï, aya urokana di, aya ï alouf.”

¹⁶ Jesus ï irokenen, “Maria.”

Maria ï falei yel, Jesus wage ifen ken, Hibru od nem irokenen, “Raboni!” (anï nē gariya, Tise).

¹⁷ Jesus iron, “Aya to urouna, ere nigin, aya Dei gein fau kel iseleya sã. Anï ere, neu turau tar gedin ule urokeneïd, ‘Aya neu Dei, āgenei Temeï, neu Negur, āgenei Negur bun kelau eselauf.’ ”

¹⁸ Anï nigin, Maria Magdala tamal, in dō fiya tar gedin ile irokenēdin, “Aya Odug ailel!” Age ye fen, Maria Jesus od enei irokenen anï, idi wogō fiyēdin.

*Jesus In Dō Fiya Tar Meleid Bun Wō Yen
(Matyu 28:16-20; Mak 16:14-18; Luk 24:36-49)*

¹⁹ Uub nē naa matu Sande aragau anï bun, Jesus nē dō fiya tar, Juda tamo nigin kumï de fen, sukar kotū difel, aaben guru de dibod mog, Jesus isi, idi atun ifar fen, iron, “Wau inosiya ā ado ibodōf!”

²⁰ Od enï irokeli fen, ï ima siri ado idi ifelnēdin. In dō fiya tar idi, Odug dile fen, fatuk bagai kulï den.

²¹ Jesus baban iron, “Wau inosiya ā ado ibodōf! Dei aya sur fiyan gen, ayag ā sur ayeik.”

²² Age ye fen, idi bun fuu fiyeĩd fen, iron, “Awa Uur Fateul waleg.

²³ ã, tamo neid mosor nigin, wedereĩ tu kalauf are, idi neid mosor nigin weder tu kelef, ã idi neid mosor nigin, wedereĩ to tu kalauf are, idi neid mosor nigin weder to tu kelef.”

Jesus Tomas Mala Bun Wõ Yen

²⁴ Anĩ ere, Jesus in dõ fiya tar meleid bun wõ yen sain, tuwelf idi neid taka Tomas (yana taka Didimus), idi geid to ibodon.

²⁵ Anĩ nigin, dõ fiya tar tunim ĩ dirokenen, “Amã Odug mailen!”

Anĩ ere, ĩ idi irokenẽdin, “Aya yogon ima bun tuti ba to ailauf, aya imau gege tuti ba bun to ano fen, aya imau siri bun to anouf, aya to momoi auf.”

²⁶ Uub tekelei ilele di, in dõ fiya tar baban fõ bun dibodon, are Tomas geid. Sukar kotũ difedin, anĩ ere, Jesus isi, idi atun ifar fen, iron, “Wau inosiya ã ado ibodõf!”

²⁷ Agef fen, Jesus Tomas irokenen, “Ogon imã gege ein uno, neu imau uleid. Imã urã siru bun uno. Waũ to ilef isif fouf, momoi dogol wo.”

²⁸ Tomas Jesus irokenen, “Neu Odug, neu Negur!”

²⁹ Age ye di, Jesus Tomas irokenen, “Õ malam aya uleyaf nigin, momoi wof. Idi meledim to dile fen, momoi def, are el fedif.”

³⁰ Jesus, in dõ fiya tar meleid bun, memelik musei inodin, are buk enei bun itotoya san.

³¹ Anĩ ere, Jesus ĩ Kristus, Negur Naal anĩ ã momoi ge fen, ĩ yana nigin momoiya bunem, ã mata walogouf nigin enei itoton.

21

Jesus Gau Yaleya Bun Memelik Inon

¹ Anĩ dum, Jesus baban in dō fiya tar gedin, Taiberias daliyoun* wō yen. Anĩ eig fe wō yen.

² Simon Pita, Tomas (yana taka Didimus), Nataniel Kana tamal Galili teneub bun, Sebedi gere tar ado, dō fiya tar uru anidim guru de dibodon.

³ Simon Pita idi irokenēdin, “Aya gau nigin ayō fenē.” Idi diron, “Amāg ō geid talauf.” Anĩ idi dile, waag bun sosō den, anĩ ere, bō anĩ bun, gau taka to dalen.

⁴ Bonimei bagai, Jesus maaĩ yerin ifaren, anĩ ere, dō fiya tar idi, Jesusem ya anĩ to kelein.

⁵ ĩ idi iweig irokenēdin, “Mou tar, ã gau taka tau walegel?”

Idi aiten dalen, “Sā.”

⁶ ĩ irokenēdin, “Waag siri biya melem kakāg urāg fen, tunĩ gei gouf.” Idi age difen sain, idi kakāg dī fiya kisi feleya san, ere nigin, gau musei biya.

⁷ Anĩ in dō fiya tamo Jesus ĩ nigin wau laa fedig ĩ, Pita irokenen, “Are Odugem!” ĩ, “Are Odugem,” ye di, Simon Pita karĩ ye fen, ĩ kolos teten tamal inũ inon anĩ yale, luwa guf fen, naanũ ifũ iran.

* **21:1:** Yana taka are Galili Daliyou.

⁸ In dō fiya tar tunī ganān, waag bun disi, kakāg gau isokosen ado dī de dilen, ere nigin, are idi daliyou yeri gerō sā, handred mita age fiya.

⁹ Sain idi kutū desin, yā kaureya anī bun, gau yā bē bret tunī ado dilen.

¹⁰ Jesus idi irokenēdin, “Ā gau gama bagai walegel tunī urousig.”

¹¹ Simon Pita waag sō ye fen, kakāg dī falaisi, maaī yerin irosin. Kakāg are gau odudug isokosen, gau are 153, gai musei biya, anī ere, kakāg to kokour fen.

¹² Jesus idi irokenēdin, “Usig, saaf wōg.” In dō fiya tar kukī de fen, takam ī to, to fiyen, “Ō aim?” Idi keleī, are Odug yogo.

¹³ Jesus isi, bret yale fen, idi ifenēdin, gaug de age fen.

¹⁴ Jesus laa bun tamal kel fā ye fen, in dō fiya tar meleid bun wō yen are, gama eneim towo fen.

Jesus Pita Baban Wau Yalen

¹⁵ Sain idi saaf dakas fen, Jesus Simon Pita irokenen, “Simon Jon naal, ō aya nigin fatuk waū laa fef, tunī eneidi neid wal fiya de?”

Pita iron, “Odug, momoi, ō keleī, aya ō nigin wau laa fef.”

Jesus iron, “Neu sipsip momou ufoutneīd.”

¹⁶ Baban Jesus iron, “Simon Jon naal, ō aya nigin waū laa fef de?”

Pita solof iron, “Odug, momoi, ō keleī, aya ō nigin wau laa fef.”

Jesus iron, “Neu sipsip kulatun wiyēdiyof.”

¹⁷ Jesus Pita iroken towo fe fen, iron, “Simon Jon naal, ō aya nigin waū laa fef de?”

Pita wau moron, ere nigin, Jesus ã to fiyẽ towo fen, “Õ aya nigin waũ laa fef de?” Pita iron, “Odug, ereb ereb ganan õ keleĩ, õ keleĩ, aya õ nigin wau laa fef.”

Jesus iron, “Neu sipsip ufoutneĩd.

¹⁸ Aya õ momoi bagai arokonok, sain õ gaun, õ naki rel, ogon oroya dõ fen uledig, anĩ ere, sain õ tubau bun, imã walese di, taka nem ifõyo ken, õ to oroyok nẽ an irouleyõf.”

¹⁹ Pita naig be fe, laaf fen, Negur fula fiya medeĩya ifenẽf anĩ nigin, Jesus od enei iron. Age ye fen, Jesus Pita irokenen, “Aya dõ wiya!”

²⁰ Pita falei yel fen, dõ fiya taka Jesus ã nigin wau laa fedig anĩ, dõ feid mog, ilen. (Tamo enei bõ saaf yõya bun, Jesus akoron mudur isen ken, iron, “Odug, aim anĩ õ kiwai ifonõf?”)

²¹ Sain Pita tamo anĩ ile fen, Jesus to fiyen, “Odug, tamo enei ã naig foug?”

²² Jesus solof irokenen, “Tamo enei mata ibod mog, aya kelauf anĩ aya orouf aufeg, õ nigin ere yok? Õ de aya dõ wiyauf.”

²³ Enei nigin, dõ fiya tar idi atun, od enei iyokelen, are dõ fiya tamo enei to laa foug den. Anĩ ere, Jesus, tamo anĩ to laa foug ya nigin to iron, Jesus ã eig ye iron, “Tamo enei mata ibod mog, aya kelauf anĩ aya orouf aufeg, õ nigin ere yok?”

²⁴ In dõ fiya tamo enei, anĩ ganan wogõ ye fen, itoton. Amã keleĩ, in od are momoi.

²⁵ Jesus ã ereb ereb museig age fen. Aya kisi afef, anĩ ganan buk bun ditotlem are, teneub ganan bun modoũ sam.

Mata Ifenēya Nē Od
The New Testament in the Marik Language of Papua
New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 18 Apr 2025 from source files dated 31 Aug 2023

d7099f9d-3bdf-5620-8eb3-7e6c51cab7ea